



القائل الحقيقي

هبة سعيد



اسم الرواية: القائل الحقيقي.

اسم المؤلفة: هبة سعيد .

المدير العام: نهى محمود .

مدير التوزيع: مصطفى الحلو .

تصميم وإخراج فني: همت العزب .

تصميم الغلاف: دعاء السيد .

التصحيح اللغوي: " أولي النهى للتصحيح اللغوي "

نهى محمود / هبة سعيد .

الطبعة الأولى: ٢٠١٧

رقم الإيداع بدار الكتب والوثائق المصرية: ٢٣٢١٥/٢٠١٧.

الترقيم الدولي: ٨-١١-٦٦١-٩٧٧-٩٧٨.



١٧ش حسن وهبة من شارع الهرم الرئيسي

خلف كايرو مول .

موبايل / ٠١٠١٤٦٢٤٢٨٨

البريد الإلكتروني:

nohamahmoud.171186@gmail.com

elshahdpublishing2016@gmail.com

محفوظ
جميع الحقوق



مقدمة

رُبينا منذ نعومة أظافرنا على عادات وتقاليد حلَّت محل الحلال والحرام؛ فارتكبنا تحت ستارهم الكثير والكثير من الخطايا معللين ما نفعله بالحفاظ على عادات وتقاليد بريئة مما نفعله؛ فنحن من نصنع تماثيل تلك العادات والتقاليد ثم نعكف على عبادتها. فهل أسعدتنا هذه العادات وتلك التقاليد؟! هل جعلت حياتنا أكثر استقرارًا وقلوبنا أكثر حبًا؟! ما بين الحب والعادات والتقاليد



القائد الحقيقي
بقلم: هبة سعيد





القائل الحقيقي

إهداء

صديقتي الغاليات

أدامكن الله في حياتي

وأنا ربكن أيامي

فلولا وجودكن فيها

ما خطت يساري ذاك الحوار

ما بين الحب والعادات والتقاليد

القائل الحقيقي

بقلم: هبة سعيد



الفصل الأول

جريمة قتل



عاد عم هريدي حارس إحدى العقارات القديمة من الخارج مُحضراً معه طلبات لأحد سكان الدور الرابع، وعند صعوده درجات السلم وجد باب شقة الأستاذ عبد الغفار مطاوع المحاسب بإحدى شركات القطاع العام بالدور الثالث مفتوحاً على مصراعيه، تعجّب عم هريدي لعلمه بأن أصحاب الشقة قد غادروا صباحاً متجهين إلى بلدتهم في عزاء تاركين ابنتهم سها وحدها في الشقة لتستذكر دروسها لأن لديها امتحان في كليتها في صباح اليوم التالي.

دقّ عم هريدي الجرس ونادى عليها بصوتٍ مرتفعٍ ولكنها لم تُجب عليه مما أثار الريبة بداخله، ومع علو صوته بدأ الجيران في الانضمام إليه، دخل عم هريدي الشقة ومعه بعض الجيران ل يبحثوا عنها في الشقة فوجدوا محتويات حجرة نومها في حالة من الفوضى ووجدوها

القائد الحقيقي

مُلقاة على الأرض قاطعة النفس مفتوحة العينين.
أسرع الأستاذ كامل أحد الجيران إلى الهاتف وقام
باستدعاء النجدة والجميع في حالة من الفزع والرعب،
وظلَّ الجميع متواجدين لحين حضور رجال المباحث...
الرائد أحمد: هما متعودين يسيوها لو حدها يا عم هريدي؟
عم هريدي: أه يا سعادة الباشا... لَمَّا بتحصل
ظروف في بلدهم ويكون عندها امتحانات... أصلها
شاطرة قوي ودايمًا بتطلع الأولى على أصحابها كلهم.
الرائد أحمد: حد من أصحابها دول بيجي يذاكر معاها؟
عم هريدي: لأ... الله يرحمها ماكانش ليها خُلطة
بحد من أصحابها... كانت من البيت للجامعة ومن
الجامعة للبيت... ولا بتروح لحد ولا حد بيجيلها غير
الآنسة سُهيلة اللي ساكنة في الصف الثاني اللي قُصاد
العمارة بتاعتنا.

الرائد أحمد: واشمعنا سُهيلة دي؟
عم هريدي: صحاب من لما كانوا في الحضانة

القائد الحقيقي

البوابة يا سعادة الباشا مفيش نملة تقدر تعدي من قدامي
من غير ما أعرف هي داخلة أنني شقة.

الرائد أحمد (مُضايقاً من كثرة حديثه): يعني

محدث غريب دخل؟؟

عم هريدي: لأ يا سعادة الباشا.

تجول الرائد أحمد بالشقة لمُعابنتها وكان كل شيء
موضوعاً في مكانه ولا يوجد آثار لأي فوضى أو عنف
على عكس الوضع في غرفة نوم سها، وجاءه النقيب
مُهيب...

النقيب مُهيب: رجاله الطب الشرعي رفعوا
البصمات وأخذوا بصمات كل الناس اللي كانوا
موجودين وقت اكتشاف الجريمة.

الرائد أحمد: المكان بيوحى إن فيه خناقة حصلت
بين المجني عليها والقاتل ومفيش دواليب ولا أدراج
مكسورة... يعني مفيش سرقة.

النقيب مُهيب: بس واضح إن المجني عليها تعرف

القاتل الحقيقي

القاتل لأن الباب مفتوح بطريقة طبيعية مفهوش
كسر... ده غير إن داخله الشقة منظمة والتكسير في
أوضة نومها اللي من الطبيعي مبيدخلهاش غير حد
قريب منها جداً وموثوق فيه.

الرائد أحمد: بس واضح إن القاتل كان خايف
وعلشان كده ساب باب الشقة مفتوح وهو نازل عشان
يجري بسرعة.

النقيب مُهيب: ده معناه إن نية القتل مكانتش
موجودة وإلا ثباته الانفعالي كان هيبقى أقوى من
كده... شكلها كانت خناقة واتطورت فخاف وجري
عشان يلحق ينزل قبل البواب ما يرجع من بره.

الرائد أحمد: إنت هتشتغل محامي للقاتل عشان
تبعد عنه تهمة القتل العمد يا حضرة الظابط؟

النقيب مُهيب: مش قصدي حضرتك... أنا قصدي
إن التخمين ده ممكن يساعدنا في تحديد القاتل إنه مش
حد مُحترف متسلط عليها مثلاً

القائد الحقيقى

الرائد أحمد: هيان... الاستعجال في القضايا دي
مش مطلوب.

النقيب مهيّب: مفهوم طبعًا.

تم استجواب كل من تواجد وقت اكتشاف الحادث
وانصرفوا إلى منازلهم جميعًا لحين احتياج استجوابهم
مرة أخرى في أي وقت لاحق، كما قام عم هريدي
بالاتصال بالأستاذ عبد الغفار والد المجني عليها
ليُخبره بما حدث لابنته، وأثناء معاينة المباحث للشقة
وجمع الأدلة من بصمات وخلافه حضر كريم على
الفور عندما سمع بما حدث ل سها من الجيران...

النقيب مهيّب: مين حضرتك؟

كريم: أنا كريم خطيبها.

عم هريدي (مُسرعًا في الرد): كنت خطيبها يا
بشمهندز... إنت نسيت إن الخطوبة دي إتفكت من كام

شهر!!

النقيب مهيّب: طب لِمَا الخطوبة اتفكت أمّال

القائد الحقيقي

حضرتك جاي ليه دلوقتي؟
كريم: أنا عارف مين اللي قتلها.
الرائد أحمد: مين اللي قتلها؟!
كريم: واحد من شقة العُزَّاب.
النقيب مُهيب: فين شقة العُزَّاب دي؟
عم هريدي: دي شقة على الصف الثاني بس دول
ولاد ناس وفي حالهم وملهومش دعوة بحد.
الرائد أحمد: وأيه اللي مخليك واثق قوي كده يا
بشمهندس إن حد فيهم هو القاتل؟!
كريم: النهاردة العصر كنت قاعد على حرف السرير
بتاعي وفتح اللاب على تراييزة في أوضتي وانشغلت
شوية فالشاشة إنظفت ورجعت سودة وشباكي كان
مفتوح... بضرب بعيني على شاشة اللاب ف لقيت
صورتها وهي واقفة في بلكونتها وبتشاور لحد
ناحيتهم... فهمت من المشاورة دي إن أهلها نزلوا
وهي في البيت لوحدها... معنى كده إن الحد ده لقي

١٢ ————— القائد الحقيقي

السكة سهلة إنه يروح عندها وهي لوحدها وحصل
اللي حصل.

عم هريدي: حرام عليك يا بشمهندز إنت عارف إن
الست سها الله يرحمها كانت في حالها وأخلاقها زي
الجنيه الذهب.

كريم: ولاد الحرام مخلوش لولاد الحلال حاجة يا
عم هريدي وإنت عارف كده كويس.

الرائد أحمد: تتهم حد فيهم بالتحديد يا بشمهندس؟
كريم: باليقين لأ.. بس أكثر واحد مشكوك فيه هو
لؤي لأنه أكثر واحد شايف نفسه فيهم.

الرائد أحمد: مين فيهم موجود في شقتهم دلوقتي يا
عم هريدي؟

كريم: كلهم.

عم هريدي: العمدة منبه عليهم كلهم يبقوا في البيت
قبل الساعة ١٢ فتلاقيهم دلوقتي في البيت.

الرائد أحمد: مين العمدة ده؟

القائد الحقيقي

عم هريدي: العمدة ده يبقى أبو سي الأستاذ علي
المحامي وسي الأستاذ مروان المرشد السياحي وعم
البشمهندز لؤي والأستاذ عمر المدرس والدكتور مراد
بتاع التوليد.

النقيب مُهيب: يعني علي ومروان إخوات ولؤي
وعمر ومراد إخوات؟

كريم: لأ لؤي مش أخو حد... ده ابن عمهم برضه.
عم هريدي: الأستاذ علي والأستاذ مروان ولاد
العمدة... والأستاذ عمر والدكتور مراد ولاد سيادة
المستشار الأستاذ فاضل... والبشمهندز لؤي ده بقى
ابن الدكتور معتز من الخواجاية اللي إتجوزها لَمَّا كان
في بلاد بره بيكْمَل تعليمه وجابه معاه لَمَّا طَلَّقها قبل ما
يرجع مصر.

النقيب مُهيب: طب طَلَّقها ليه؟

عم هريدي: العمدة لما صمّم إن الدكتور معتز يرجع
من هناك، مراته الخواجاية مرضيتش تيجي معاه ف راح

مطلّقتها وجاب الولد وجهه.

النقيب مُهيب: طب مسبلهاش الولد ليه؟!!

كريم: كانت فنانة تشكيلية ودايمًا بتسافر تحضر

معارض في أوروبا كلها وعشان كده معترضتش إنه

ياخد سي لؤي... وسي لؤي كل صيف بيروح يقضي

معاها ثلاث شهور... ومن حبه للرسم زي والدته طلع

مهندس ديكور.



الفصل الثاني

شقة العُزَّاب



دقَّ النقيب مُهيب جرس شقة العُزَّاب ففتح له الباب
عم صالح المسئول عن المنزل...
النقيب مُهيب: مساء الخير.
عم صالح: مساء النور يا بني.
النقيب مُهيب: الأساتذة موجودين؟
عم صالح: أيوه حضرتك عايز مين فيهم؟
النقيب مُهيب: كلهم.
عم صالح (مُستغرباً): ثانية واحدة.
تركه عم صالح لعدَّة دقائق على باب الشقة ثم عاد
ففتح الباب من جديد ومعه الأستاذ علي...
الأستاذ علي: تحت أمر حضرتك.
النقيب مُهيب: أنا النقيب مُهيب مباحث وكنت عايز
أسأل حضراتكم شوية أسئلة بخصوص سها القتيلة
اللي في العمارة اللي قصادكم... أكيد سمعتم الخبر.

القائد الحقيقى ————— ١٦

أستاذ علي (مُتأثراً): أيوه... الله يرحمها ويجازي
اللي قتلها... تحت أمر حضرتك إتفضل.
دخل مُهيب حجرة الصالون وحضر الشباب جميعاً
وجلسوا معه...

النقيب مُهيب (ينظر إلى علي): متعرّفتش بيكم؟
علي: أنا علي الأسيوطي... علي عبد المنعم
الأسيوطي محامي... وده أخويا عمر مدرس... ودول
مراد ابن عمي دكتور ومروان أخوه صاحب شركة
سياحة... وده لؤي ابن عمنا مهندس ديكور.
النقيب مُهيب: أهلاً وسهلاً.

علي: أهلاً ب حضرتك... تحت أمرك.
النقيب مُهيب: كنت عايز أعرف إذا كان حد فيكم
شاف القتيلة النهاردة في البلكونة بتاعتها؟
مراد: احنا كلنا بنبقى بره البيت ومش بنرجع لحد
الساعة ١٢ تقريباً.

النقيب مُهيب: طب في أيام الأجازات بتاعتكم
محدث منكم بيشوفها في البلكونة؟

القائد الحقيقي

عمر: سها الله يرحمها كانت بنت مُجتهدة وأنا كنت
بدرّسلها وهي في الثانوية العامة وملهاش في وقفة
البلكونات أصلاً.

النقيب مُهيب: طيب تشكُّوا في حد ممكن يكون هو
القاتل؟

لؤي: كريم.

النقيب مُهيب: اللي كان خطيبها؟!

لؤي: أيوه.

النقيب مُهيب: ليه؟

لؤي: عشان فسخت خطوبتها منه.

عمر (مُندفعاً): مش معنى إنهم فسخوا الخطوبة يا

لؤي يبقى يروح يقتلها!! كريم ابن ناس ومتربي وأنا

عارف أخلاقه كويس.

لؤي (باستهانة): ده قبل الترامادول.

النقيب مُهيب: ماله الترامادول؟!

لؤي: كريم من سنة بعد خطوبتهم أتلم على شوية

عيال بايظة علّموه ياخذ ترامادول... بعد شوية أهله عرفوا

وحاولوا يعالجوه من غير ما يعرفوا أهلها حاجة... بس
ولاد الحلال من الجيران قالولهم بعد ما عرفوا.

النقيب مُهيب: مين الجيران دول؟

لؤي: كذا حد مش حد معين.

النقيب مُهيب: عملوا أيه لما عرفوا؟

لؤي: سها كانت بنتهم الوحيدة... خافوا عليها
وراحوا لوالدته عشان يفسخوا الخطوبة... بس أمه
قعدت تعيط وتتحايل عليهم إنهم يصبروا عليه لحد ما
يتعالج علشان حالته متسؤش زيادة لوعرف إن
الخطوبة اتفسخت وهو في المستشفى.

مروان: فصبروا؟

عمر: قالوا الواد ابن حلال وولاد الحرام مخلوش
لولاد الحلال حاجة... وقالوا يستنوا يشوفوا نتيجة
العلاج.

النقيب مُهيب: اتعالج؟

مراد: اتعالج وخرج من المستشفى وبقي كويس
جدًا... بس ولاد الحرام رجعوا اتلموا عليه تاني وحالته

اتنكست وساءت عن الأول بكثير... وبقى يعاني من حالات هياج شديدة وهلاوس وتهيؤات طول الوقت.

النقيب مُهيب: اتعالج تاني؟

لؤي: هرب من المستشفى ومرضيش يتعالج وسها بقت بتتفزع منه ونفسيته ساءت.

مروان: طبعاً فسخت الخطوبة في المرة الثانية من غير مناقشة.

لؤي: باباها كان عنده حق... حقه وحق بنته... مش عشان نفسية كريم متبوظش يقهر بنته... وبعدين هو اللي عمل في نفسه كده يبقى يستحمل نتيجة أعماله هو مكانش صغير.

النقيب مُهيب: كريم اتعرضلها بعد كده؟

لؤي: عمل فضايح كتيرة وفرّج الشارع كله عليهم لولا إن الجيران كلهم عارفينهم وعارفين أخلاق بنتهم وعارفين حكايته مع الترامادول فعرفوا إن هو اللي غلطان مش هما.

مروان: لو حضرتك سألت أي حد في الشارع هيقولك الكلام ده.

القائد الحقيقي

النقيب مُهيب: بس جيرانهم واحنا بناخد أقوالهم
محدثش فيهم قال الكلام ده!!

علي: طبعي ميقلوش عشان صاينين العشرة مع
أهل كريم... أهل كريم ناس طيبين جداً وفي حالهم
طول الوقت.

النقيب مُهيب: وإنتوا مخبتوش زي باقي الجيران
ليه؟

لؤي: حضرتك سألت واحنا جاوبنا لإننا مبنخافش
ومفيش حاجة جيبانا ورا ومخلياانا متخلفين عن العالم
المتقدم لحد دلوقتي إلا المحسوبيات دي.

النقيب مُهيب (موجهًا الكلام ل لؤي): إنت فيه
عداوة شخصية بينك وبين كريم؟

لؤي (مُتفاجئًا): عداوة أيه؟! لأ طبعًا...
بالعكس... أنا وهو كنا أصحاب جداً لحد ما عرف
سكة الترامادول ومرضيش يسمع كلامي ويبطله
فبعدت عنه... عمي العمدة لو كان عرف حكاية زي
دي كان قتلني بإيده.

القائد الحقيقي

النقيب مُهيب: فِضِلْ يعمل المشاكل دي لحد
الحادثة؟

مروان: لأ الحق لله هو سكت من فترة؟

النقيب مُهيب: إشمعنا؟!

مراد: أهله وصلوا للدكتور جديد بدأ معاه العلاج
وبدأت حالته تستقر.

النقيب مُهيب: طب محاولش يروح يعتذرلهم لَمَّا
حالته بدأت تستقر؟

علي: والدته طلبت منهم إنهم يستقبلوهم في البيت
عندهم عشان يعتذر بس سها رفضت بشدة لأن نفسيتها
كانت لسة تعبانة من اللي عمله من فضايح معاها.

النقيب مُهيب: طب ليه بتتهمه دلوقتي يا بشمهندس
لو حالته خلاص استقرت زي ما بتقول؟

لؤي: الله أعلم حالته استقرت فعلاً وألا كان بينهم
لحد ما يعمل عملته!! كريم ذكي جداً... دماغ مهندس
إليكترونيات مش سهل تعرف جواها إيه!!

النقيب مُهيب: يعني إنت بتوجّه الاتهام ل كريم
بشكل رسمي؟

لؤي: أكيد استغل سفرهم وطلعها وهي لو حدها...
هو وراه حاجة غير إنه يبص من شباكه طول اليوم على
بلكونة أوضتها!!

النقيب مُهيب: تمام... كده هحتاج حضراتكم بكرة
الصبح في النيابة إن شاء الله عشان تتسجل أقوالكم في
محضر رسمي.

عاد النقيب مُهيب إلى شقة مها حيث كان الرائد
أحمد قد استقبل الأستاذ عبد الغفار عند عودته من
البلدة بعدما عرف بما حدث لابنته...

الرائد أحمد: البقاء لله يا أستاذ عبد الغفار.
أستاذ عبد الغفار (مُنهارًا): البقاء لله... أنا هتجنن!!
إزاي ده حصل؟!

الرائد أحمد: هي بنتك ليها أي أعداء؟
أستاذ عبد الغفار: أبداً... دي يا قلبي ملهاش لسان
وكل الناس بتحبها.

القائد الحقيقي

الرائد أحمد: يعني حضرتك مش بتوجه إتهامك لحد؟
أستاذ عبد الغفار (باكياً بشدة):.....
الرائد أحمد: إفتكر حضرتك كويس لو ليها خلاف
مع حد حتى لو بسيط أو قديم.
أستاذ عبد الغفار (بعد فترة من الصمت والتردد): كريم.
الرائد أحمد: خطيبتها السابق!!
أستاذ عبد الغفار: أيوه... هدها كثير بالقتل بعد
مافسخنا خطوبتها منه وقالها مش هخلي حد غيري
يتهنا بيكي.
النقيب مُهيب: وهو كان حد تاني اتقدم لها عشان
يفكر يقتلها زي ما هدها؟
الأستاذ عبد الغفار (بعد كثير من الصمت وبصوتٍ
منخفض): أيوه.
النقيب مُهيب: و حضرتك بتوشوشنا ليه يا أستاذ عبد
الغفار؟!
الأستاذ عبد الغفار: أصل الموضوع ده كنا مخلين
سر عشان كريم ميئديهاش.

القائد الحقيقي

الرائد أحمد: ولَمَّا الموضوع ده كان سر يبقى هو
عرف منين وجه قتلها بسببه؟!!

الأستاذ عبد الغفار: الأمر ميسلمش يعني ممكن زي
ماكان بيراقبها من البلكونة طول الوقت يبقى ممكن كان
بيراقبها لَمَّا كانت بتخرج كمان.

النقيب مُهيب: وهي كانت بتخرج مع خطيبها
الجديد؟

الأستاذ عبد الغفار: لأ طبعاً بس يوم قراية الفاتحة
وتلبس الدبل خرجنا أنا ومامتها وهي الله يرحمها
ولؤي.

النقيب مُهيب: بشمهندس لؤي جاركم؟
الأستاذ عبد الغفار: أيوه.

الرائد أحمد: وهو كان معاكم بصفته إيه؟!
الأستاذ عبد الغفار: ما هو العريس!

النقيب مُهيب: يعني لؤي بعد الفضايح اللي كريم
عملها ل سها دي كلها اتقدملك وخطبها؟!
الأستاذ عبد الغفار: سمعة بنتي كل الشارع يحلف

بيها وعارفين إن كريم كان بيفتري عليها... وطلب لؤي لإيدها في الوقت ده رجّعها ثقتها في نفسها من جديد إن حد يكون عارف كل الفضايح دي وبرضه جاي يتقدم لها.

النقيب مُهيب: ده كان أدعى إنكم تعلنوا الخطوبة عشان كرامتها ترجعها من تاني.

الأستاذ عبد الغفار: لؤي اقترح نخلي الموضوع في السر لحد ما كريم يخف خالص عشان حالته متتنكسش من جديد ويأذي البنت من تاني.

النقيب مُهيب: بس لؤي ماجابليش سيرة الخطوبة دي لما كنت عنده من شوية

أستاذ عبد الغفار: لأن الموضوع سر زي ما قولت لحضراتكم حتى ولاد عمامه مايعرفوش عنه حاجة الرائد أحمد: يعني خطبها من غير إذن عمه العمدة؟!!

أستاذ عبد الغفار: قال هيبقى يقوله قبل الفرحة وقت مانعلن الخبر

القائد الحقيقي

النقيب مُهيب: ولو كان رفض وقتها؟!
 أستاذ عبد الغفار: عمه بيحبه وماكانش هيزعله
 خصوصاً إنه كان سبب في إن لؤي إتربي بعيد عن حضن
 أمه فضميره مأنبه من ناحيته وعائز يفرحه بأي شكل.
 الرائد أحمد: يعني حضرتك بتتهم كريم بشكل
 رسمي إن هو اللي قتل بنتك؟

أستاذ عبد الغفار: محدش كان عايز ياذيها غيره!
 النقيب مُهيب: اللي قتل بنتك دخل لحد أوضة نومها
 بهدوء من غير عنف... تفتكر لو موقف سها من كريم كان
 زي ما بتقول كده يبقى هتدخله من باب الشقة أصلاً؟!
 أستاذ عبد الغفار: يمكن هددها بسكينة من ساعة
 مافتحت باب الشقة لحد مادخل بيها لأوضة النوم.
 النقيب مُهيب: بنت حضرتك ماتت مخنوقة مش
 مدبوحة.

أستاذ عبد الغفار (غاضباً): هو حضرتك بتحقق
 معايا أنا بدل متحقق مع اللي قتل بنتي؟! حضرتك
 سألتني إنت بتتهم مين وأنا جاوبت.

القائد الحقيقي

الرائد أحمد: خلاص يا مُهيب كفاية كده... حضرتك
هتشرف بكرة الصبح في النيابة لسماع أقوالك في محضر
رسمي يا أستاذ عبد الغفار... والبقاء لله مرة ثانية.
أستاذ عبد الغفار (باكيًا): طب أدفن بنتي الأول!!
النقيب مُهيب: لازم تشريح الجثة الأول قبل الدفن
أستاذ عبد الغفار (باكيًا بشدة): "لا حول ولا قوة إلا
بالله" ... "الله الأمر من قبل ومن بعد" ... "الله ما أعطى
ولله ما أخذ."



الفصل الثالث

في النيابة



حضر الجميع إلى سراي النيابة باكراً...

لؤي: البقاء لله يا عمي.

أستاذ عبد الغفار: ونعم بالله.

لؤي: أنا اتهمت كريم امبارح إن هو اللي قتل سها وعشان

كده جاي النهاردة أقول الكلام ده في محضر رسمي.

أستاذ عبد الغفار: أنا كمان عملت كده وقولتلهم إن

إنت خطبتها قبل الحادثة.

لؤي (مستنكراً): ليه بس كده يا عمي؟! أنا مقولتش

ده امبارح.

أستاذ عبد الغفار: متخافش يا بني أنا فهمتهم إن إنت

مكانش ينفع تقول كده قدام ولاد عمامك عشان

الموضوع سر... إنت الوحيد اللي كنت مفرح بنتي بعد

اللي عمله معاها كريم ومستحيل أأذيك دلوقتي في

وسط ناسك.

لؤي: خلاص يا عمي ولا يهملك... على العموم
كويس إنك قولتلي عشان أقول جوه لَمَّا أدخل عند
وكيل النيابة.

أستاذ عبد الغفار: كريم اتهمكم إمبراح إن حد منكم
هو اللي عمل كده وإنت على وجه التحديد.
لؤي (مُندهشاً): إيه اللي خلاه يقول كده المجنون ده؟!
أستاذ عبد الغفار: شافها في شاشة اللاب بتاعه
بتشاور لحد من البلكونة ناحيتكم قبل الحادثة على
طول.

لؤي: إمام... عشان كده النقيب مُهيب جالنا
مخصوص بالليل يتكلم معانا... عامةً ماشي.
أخبر لؤي الشباب سريعاً بهذا الكلام قبل دخولهم
لوكيل النيابة لسماع أقوالهم...

مراد: شاشة آيه ولاب آيه المهووس ده!!
علي: كده يبقى احنا كمان لازم نوجهله نفس الاتهام
بأن هو اللي قتلها بسبب المشاكل اللي كانت بينهم.

القائد الحقيقي

عمر: لأ طبعاً مستحيل... أنا مش ممكن أشهد على
كريم في حاجة زي دي.

مروان: أمّال إنت جاي ليه النهاردة يا مستر؟!!

عمر: أنا جاي عشان الظابط إمبراح طلب مننا نشهد
بالمشاكل اللي كانت بين سها وكريم... وأنا جاي على
الأساس ده وبس... إنما أتهمه بقتلها ف ده مستحيل
وأنا مش هعمل كده.

لؤي: خلاص متقولش... كفاية احنا هنقول ونبقى
أربعة قصاد واحد،
عمر: إنتوا أحرار.

مروان: إبقى ورينا هتفضل أسد كده قدام عمك
العمدة لَمَّا يعرف إنك مرضيتش تقف في ظهر لؤي ابن
عمك وتشهد ضد اللي عايز يورطه وألا هتقلب قطة
وقتها؟

لؤي: خلاص يا مروان... كل واحد حر... ومتشكر
قوي يا مستر.

القائد الحقيقي

عمر: يا لؤي افهمني أرجوك وبعدين ما هو اتهمنا
احنا كمان... يعني أنا زبي زيك.

لؤي: فاهمك وعلشان كده مش زعلان منك.

و بالفعل تم سماع شهادتهم وانصرفوا من سراي
النيابة ك شهود ليس عليهم غبار ولا أي دليل يُدين أحداً
منهم على اتفاق بعدم مغادرة البلاد قبل مراجعة النيابة
التي قد تحتاجهم للشهادة من جديد إلا لؤي الذي تمَّ
أخذ بصماته على اعتبار إن كريم ليلة وقوع الحادث
وجّه الاتهام إليه بصفة خاصة، كما حضر كريم إلى
سراي النيابة لسماع شهادته هو الآخر...

وكيل النيابة: صحتك عاملة أيه دلوقتي يا

بشمهندس؟

كريم: الحمد لله أنا خفّيت خلاص!

وكيل النيابة: طب أيه ردك على اتهام أستاذ عبد

الغفار بإنك اللي قتلت سها؟

كريم (مُنزعجاً وهو الذي اعتبر نفسه قادمًا للنيابة

القائد الحقيقي

كشاهدًا وليس كمتَّهاً): مستحيل أقتلها... محدش
بيقتل روحه!!

وكيل النيابة: إنت كنت بتحبتها؟

كريم: أنا لسه بحبها.

وكيل النيابة: بس سها ماتت خلاص.

كريم: بس لسه حبها جوه قلبي مماتش.

وكيل النيابة: بس سها موقفتش جنبك في مرضك!!

كريم: وقفت جنبي أول مرة لحد ما اتعالجت بس أنا

اللي خذلتها ورجعت للهباب ده تاني.

وكيل النيابة: طب لَمَّا إنت فاهم كده ليه الفضايح

اللي عملتها لَمَّا سابتك؟

كريم: كنت لسه ساعتها مبدأتش العلاج الجديد مع

دكتور عبد الرحمن اللي بياشر حالتي دلوقتي... أنا

حالتي بدأت تستقر والدليل على كده إني بطلت

الفضايح دي من فترة.

وكيل النيابة: تقدر تثبت إن إنت مقتلتهاش؟

القائد الحقيقي

كريم: مفيش إثبات أصلاً إن أنا قتلتها!!
وكيل النيابة: بص يا بشمهندس... إنت شكلك ابن
ناس ومش وش بهدلة... فياريت تتكلم معايا عدل
عشان ماضطرش أغير معاملتي الهادية دي معاك.
كريم: أنا مبخرجش من البيت غير لَمَّا بروح
جلسات العلاج بتاعي... حضرتك ممكن تسأل عم
هنداوي بواب بيتنا... هو راجل كبير في السن ومش
بيسيب البوابة عندنا.

وكيل النيابة: طب ليه وجَّهت اتهامك لحد من شقة
العُزَّاب اللي ساكنين في البيت اللي في وش بيتها دول
بالذات!؟

كريم: يوم الحادثة كنت قاعد في أوضتي وشباكي
مفتوح واللاب بتاعي مفتوح فانعكاس صورتها وهي
واقفة على باب بلكونتها كان باين عندي على شاشة
اللاب إنها بتشاور لحد وكأنها بتعرِّفه إنها قاعدة
لوحدها.

وكيل النيابة: يا بشمهندس قولتلك تعالى معايا عدل بلاش تهيئات... محدش لسه بيقف في البلكونة يشاور لحد... الموبايلات مالية الدنيا والدقايق تقريبا بقت ببلاش... وبعدين على كلامك ده يبقى ممكن تكون إنت اللي استغلتي المعلومة دي بفرض إن ده حصل أصلاً وتكون إنت اللي طلعت عندها وقتلتها.

كريم: أستاذ عبد الغفار راجل بخيل مش بيديها مصروف غير على أد مواصلاتها بحجة إنه خايف عليها من فرط الفلوس في إيدها حتى سندوتشاتها كانت بتأخذها معاها من البيت... وأقتلها ليه وأنا لسه بحبها!! ولو أنا اللي عملت كده يبقى هقولكم كده وكأني مش واخد بالي إن الفرض ده أكيد هيجي على بال المباحث أو النيابة!! أنا أدمنت ترامادول مش جالي تخلف حضرتك!!

وكيل النيابة: طب لو أنا صدقت حكاية بخل باباها دي... كونك لسه بتحبها ف ده معناه إنها بنت أخلاقها

كانت كويسة... يبقى إزاي بتقف تكلم شباب من
بلكونتها؟ مش جرأة زيادة دي!!

كريم: الزن على الودان أمر من السحر والفترة الأخيرة
أنا كنت سبب في توترها وممكن حد فيهم استغل حالتها
واستغل ضعفها ودخل قلبها من النقطة دي.

وكيل النيابة: وليه اتهمت لؤي بالتحديد؟

كريم: لأ مش بالتحديد.. لما حضرة الضابط طلب
مني أحدد منهم واحد.. قولت هو الأقرب لأن هو اللي
شايف نفسه فيهم.. بس مش بالضرورة يكون هو، تم
أخذ بصمات كريم وانصرف لبيته نظرًا لأنه لا يوجد أي
دليل ضده حتى الآن.

كما أمر وكيل النيابة كمال محفوظ المباحث
بمراقبة كريم وشباب شقة العُزَّاب ٢٤ ساعة يوميًا.



الفصل الرابع في مكتب علي المحامي



بعد خروج الشباب من سراي النيابة توجهوا إلى مكتب علي لمناقشة بعض الأمور المستجدة...

علي: إنت مقولتلناش ليه قبل كده يا لؤي موضوع خطوبة سها دي؟

لؤي: قولتلكم كان سر عشان أهلها خافوا من رد فعل كريم وقت تعبته.

علي: ومقولتلناش ليه إمبارح بعد الظابط ما مشي من عندنا؟!!

لؤي: احترمت سرها بعد ما ماتت.

علي: وليه قولت دلوقتي؟

لؤي: أبوها اللي فضح السر... يبقى خلاص مفيش حاجة لو قولت أنا كمان.

مروان: إنت كنت هتكمل الجواز دي وألا كانت

أمريكاني زي كل مرة؟

لؤي: عيب عليك البنت دي مش وش لعب.

مروان: طب عيني في عينك كده!!

لؤي: لو كانت أمريكاني كنت هاخذك معايا زي كل مرة بروح أخطب فيها واحدة وأقضي معاها الشهر وأسيبها بعد ما أخذ اللي أنا عايزه منها.

عمر (مُنزعجًا بشدة): أيه اللي بتقوله ده منك له؟! إنت كنت بتخطب بنات الناس وتهتك عرضهم وتسيبهم بعد كده!!

لؤي: الله يباركلك احنا مش في حصة مدرسة دلوقتي... مفيش واحدة بتفرط في حاجة غصب عنها. عمر: أيه الاستهتار والبرود ده!! البنات دول بيآمنوك عشان دخلت البيت من بابه!!

لؤي: هي الدبلة بقت كتب كتاب وأنا معرفش!!

عمر: الفاتحة كتاب... أهلنا علّمونا كده!!

لؤي: تعليم فاشل زي اللي بتعلموه للولاد في المدارس بالظبط... وبعدين مش كفاية إن أنا مزعلتش

القائد الحقيقي

منك النهاردة ساعة النيابة!! هنبداً حصة جديدة هنا
كمان!!

علي: الكلام ده مش وقته دلوقتي خلونا في المهم...
يعني إنت ملكش دخل في اللي جرها ده يا لؤي؟
لؤي: إنت بتشك فيا يا علي!!!؟ بقولك باخد اللي
عايزه بالرضا وبمشي... وأكد يعني لو عايز حاجة زي
دي مش هيبقى جوا بيتها... أضعف الإيمان هقابلها بره
في السر ده حتى إذا بليتتم فاستتروا.

علي: أنا مش بسألك عشان بشك فيك وألا لأ... أنا
بسألك عشان لو متورط في حاجة أعرف أظبط دفاعي
عنك من دلوقتي.

لؤي: متخافش أنا صاغ سليم.

علي: طب أنا عايز أعرف كل واحد فيكم قال كان
فين وقت وقوع الجريمة.

مراد: أنا كنت في المستشفى بعمل ولادة قيصرية وده
مُثبت في الأوراق.

عمر: وأنا كنت ف السنتر عندي حصة ثانوية عامة
وكاننيهات الطلبة اللي مختوم فيها إنهم حضروا الحصة
كفيلة بإثبات صحة كلامي.

مروان: قولت كنت مع صحابي.

علي: وإنت كنت فين؟

مروان: كنت عند سناء.

علي: طب مقولتش الكلام ده ليه في النيابة؟

مروان (مُندفعًا): إنت اتجننت!! هقول إيه؟ كنت
عند مراتي اللي متجوزها عرفي من ورا أبويا العمدة
عشان مطلقة وعندها ولدين وبنت وهو مصمم إني
أتجوز بنت بنوت!!

علي: وفيها أيه لَمَّا تقول؟ مش عشان تنقذ نفسك

من حبل المشنقة!!

مروان: عشان أبوك يجي يطُخني وطلقها يروح
ياخد العيال منها وش!! وبعدين حبل مشنقة أيه إنت
كمان!!

القائد الحقيقي

علي: طب وقولت مين صحابك دول؟

مروان: سامي وزيزو اللي شهدوا على عقد جوازي
أنا وسناء... حكيثلهم اللي حصل وصعب عليهم
أجيب سيرة سناء في النيابة فوافقوا إنهم يشهدوا لو
اتسألوا إنهم كانوا معايا.

عمر: شهادة زور.

مروان: شهادة يستروا بيها ولية.

علي: وإنت يا لؤي قولت كنت فين؟

لؤي: قولت كنت بعمل شوبنج عشان محتاج بدلة
جديدة أروح بيها فرح طارق صاحبي.

عمر: إنت بتستهبل!! إنت كل هدومك بتجيبيها
وإنت راجع من السفر من عند أمك.

لؤي: وهما كانوا هيعرفوا الشوبنج بتاعي بعمله مين
إنت كمان!!

علي: طلبوا منك فواتير شرا تثبت مكانك في الوقت ده؟

القائد الحقيقي

لؤي: قولت ملقيتش حاجة عجبتي فرجعت البيت ونمت.

علي: وإنت كنت فين في الوقت ده؟

لؤي: كنت بظبط عروسة جديدة.

عمر (مُندهشًا): الله يخرب بيتك إنت مش لسه

بتقول كنت خاطب سها قبل ما تقتل!!

لؤي: بقولك سها دي بنت ناس تتخطب للجواز

والبيت والعيال إنما عروسة امبارح دي كانت خطوبة

أمريكاني كالعادة.

مروان: يعني مجبتليش سيرة المرادي!!

لؤي: بقولك كنت لسه بظبط بس شكلها فقر من

أولها يخرب بيتها!!

عمر: قول شكلها بت حلال وربنا بيحبها وساترها

معاها ومع أهلها.

مراد: طب ولو سألوك عن الأماكن اللي عملت فيها

الشوننج وراجعوا الكاميرات وملقوش حضرتك فيها؟!!!

٤٢ القائل الحقيقي

لؤي: هقول كنت بتفرج على الفاترينات لحد ما
ألاقي حاجة تعجبني وبعدين أدخل فلما مشوفتش
حاجة عجبتي مدخلتش.

مروان: وعرفت تظبط العروسة دي في الآخر؟

لؤي: عيب عليك إنت عارفني.

علي: طب تمام كده.

لؤي: إنت بقى يا أستاذ علي كنت فين حضرتك
وقت وقوع الجريمة؟

مروان: لا علي أخويا بره الليلة بتاعة الحریم دي
خالص... إنت نسيت يا ابني وألا أيه!!

علي: نعم إنت وهو!! إنتوا هتفوقوا عليا وألا أيه؟

لؤي: إنت عمّال تسألنا كنتوا فين... يبقى لازم
نعرف احنا كمان إنت كنت فين عشان نعرف نتصرف
ونشوفلك محامي كويس من دلوقتي يظبط دفاعه عنك
لو كان لك يد في اللي حصل ل سها.

مروان: يا ابني قولتلك علي أخويا بره الليلة دي من

القائد الحقيقي

ساعة ما ساب كوكي لَمَّا أبونا العمدة والحاجة رفضوا
الجوازة دي.

لؤي: قهر واستعباد... هما عشان خَلَّفوه يتحكموا
في قلبه وفي اختيار شريكة حياته؟!
مروان: إنت عارف إن الجوازة دي كانت هتبقى
مصدر قلق للعيلتين.

لؤي: طب وفيها أيه لَمَّا مسلم يتجوز مسيحية مادام
مش حرام!!

مراد: مش حرام في الدين عندنا، بس خطيئة عندهم
وعيلتها مكانتش هتسكت وكان هيتفتح بحر دم ملوش
آخر.

لؤي: فيقهروا البنت والولد وهي تترهبين وتدخل
الدير وهو يقضي باقي حياته مموت نفسه ما بين
المحكمة والمكتب لآخم نفسه في قضايا تعويضات
الغلاظة؟!!

عمر: دي رسالة حق بيأديها.

القائد الحقيقي

لؤي: معرّفش يجيب حقه لنفسه يبقى هيعرف
يجيب حق غيره!! فاقد الشيء لا يُعطيه.

عمر: غلط... فاقد الشيء أكثر واحد بيحس بوجع
غيره المحروم زيه وعشان كده بينصف الغلابة ويقف
في ظهرهم.

لؤي: وهو حقه فين؟

علي (مُستسلماً): عند الله... حقي عند الله.

مراد: ونعم بالله... عايزنا في حاجة تانية يا علي وألا
خلاص؟ عشان عندي عملية كمان ساعة ولازم ألحق
أروح المستشفى.

علي: لأ خلاص كده... بس ياريت كل واحد فيكم
الفترة الجاية يعرّفني كل حاجة تخصه أول بأول لحد ما
القضية دي تخلص وتعدي علي خير.

مروان: هي كده مش خلاص خلصت من ناحيتنا؟!

علي: أكيد النيابة والمباحث مش هيسبوننا في حالنا
لحد ما يوصلوا للمجرم الحقيقي... يعني يا مروان

القائد الحقيقي

بلاش سهرات قمار اليومين دول.

مروان: والقمار ماله بجريمة القتل؟!

علي: لو بيرا قبوك يبقى مفيهاش حاجة لَمَّا ظابط
مباحث يجامل ظابط صاحبه في مكافحة الآداب مثلاً.

مروان: وأنا مالي ومال الآداب؟!

علي: الشقة اللي بتروح تلعب فيها... قمار بس؟؟؟
مروان: لأ.

علي: يبقى اتقي الله في نفسك وفينا اليومين دول
شوية عشان لو اتمسكت وعرفت أعديك منها مش
هعرف أعديك من تحت إيد أبوك العمدة... كمان
متحاولش تروح اليومين دول ل سناء.

مروان: إنت بتهرج. صح؟؟؟ لا قمار ولا سناء!!!

طب أعيش أعمل أيه في حياتي أنا؟

عمر: شوف شغلك يا أخي وانتبه لشركة السياحة

بتاعتك شوية فرصة تعدل حالها اللي مال من مدة.

لؤي: إنت ليه يا عمر محسّسني إنك شيخ من شيوخ

٤٦ — القائل الحقيقي

الأزهر أو داعية في قناة فضائية من بتوع اليومين دول
مش مدرس إنجليزي وراجل عقله كبير ومُتفتح؟! وألا
كنت بتخالف العادات والتقاليد إنت كمان ليه ورايح
تحب واحدة أكبر منك في السن؟

عمر: سيدنا النبي عليه أفضل الصلاة والسلام اتجوز
السيدة خديجة رضي الله عنها وكانت أكبر منه ب ١٥ سنة.
مروان: طب ما هو اتجوز برضه السيدة ماريما
القبطية... يعني علي أخويا مغلطش لَمَّا حب كريستين.
مراد: يا جماعة الخير الله يصلح حالي وحالكم...
الكلام ده كله ملوش لزوم دلوقتي... الست حامل في
توأم وحالتها حرجة ولازم أروح أولدها دلوقتي.
علي: خلاص يا شباب نتقابل بالليل على العشا إن
شاء الله... تقدرُوا تمشوا دلوقتي.



الفصل الخامس

وشوش



نزل مراد من مكتب علي مُسرِعاً ليلحق المريضة
بالمستشفى وأثناء قيادته للسيارة رنَّ هاتفه الجوال...
مراد: ألو.

سوزان: ألو!! ببساطة كده ألو!!

مراد: والله يا حبيبتى غضب عني... أكيد عرفتي اللي
حصل امبارح ل سها؟

سوزان: الله يرحمها عرفت من ماما وزعلت قوي
والله، وسهيلة من ساعة ما عرفت وضغطها وطي، وماما
وبابا محتاسين بيها من وقتها والدكتور كان عندهم
طول الليل بيركبلها في محاليل لحد ما حالتها بدأت
تستقر من شوية.

مراد: طب الحمد لله ألف سلامة عليها يا حبيبتى.

سوزان: تسلملي يا حبيبي يارب... بس تعالى هنا

مقولتيش إنت أيه دخلك في موضوع سها؟! تكونش
كنت بتحبها في السر من ورايا!!

مراد: أحبها أيه وهباب أيه بس!! ده كريم الله يخرب
بيته اتهمنا أنا وأخويا وولاد عمامي إن حد فينا اللي
قتلها لأنه شافها بتشاور لحد من بلكونتها قبل الحادثة
فيما معناه إنها في البيت لوحدها.

سوزان: طب ما يمكن كانت بتشاور ل سهيلة!!
مراد: تصدقي صح!! مجاش في بال حد فينا دي
سوزان: طب وعملتوا أيه؟

مراد: اتهمناه احنا كمان بإن هو اللي قتلها لأنه سبق
وهدها بالقتل قدام الشارع كله.

سوزان: يا نهار أسود!! كده ممكن يأذيكم ده مجنون
ومش مسئول عن تصرفاته!! وأصلاً النيابة المفروض
متأخدهش بشهادته لأنه مريض نفسي وخاضع للعلاج
الفترة دي.

مراد: نفسي مش عقلي وكمان بدأت حالته تستقر...
وكده كده النيابة أخلت سبيلنا وسبيله لإن مفيش دليل
ضد أي حد فينا بس وكيل النيابة طلب مننا محدش يسافر
من غير مايقوله عشان لو احتاجنا تاني في أي وقت.
سوزان: يحتاجكم تاني ليه؟

مراد: ممكن تظهر أدلة جديدة تدين حد فينا من
جديد.

سوزان: يا ساتر يارب.
مراد: حبيتي بلاش نتقابل اليومين دول لحد
الموضوع ده ما يعدي على خير.

سوزان: طب ليه بقى الكلام اللي يزعل ده!!
مراد: حبيتي علي بيقول ممكن يكونوا بيراقبونا وده
ممكن يعملك مشاكل مع جوزك لو حد كان بيراقبني
وشافك معايا.

سوزان: خلاص أرجع آجيلك العيادة تاني زي
الأول... إنت ناسي إن أول معرفتنا كانت فيها؟

القائد الحقيقي

مراد: حبيبتي إنتِ ناسية إن موضوع الخلفة ده إنتِ نهتية مع جوزك بإنك خلاص مش عايزة تتعالجي وهو لو عايز عيال يروح يتجوز واحدة تانية!!
سوزان: يوه... هقوله حاسة بتعب ومحتاجة أروح للدكتور عشان أطمئن... مش قضية يعني.
مراد: لأ بلاش الفترة دي أحسن احنا منضمنش الظروف.

سوزان: طب أشوفك لَمَّا أروح ل ماما؟
مراد: هتشوفيني فين؟ في بير السلم مثلاً!! إنتِ ناسية إننا ساكنين في الشارع سوا ومشوفتكيش غير لَمَّا جتيلي العيادة ومعرفتش إنك جارتِي أساسًا غير بعد ماتصاحبنا!!

سوزان: اتصاحبنا؟!!! بقى اسمها دلوقتي لَمَّا اتصاحبنا يا مراد!!

مراد: حبيبتي إنتِ عارفة قصدي كويس وإن كلامي مقصدش بيه أي حاجة وحشة... احنا قعدنا فترة

القائد الحقيقي

صحاب ع انت بعد مجتيلي العيادة بتفضفضيلي عن
مشاكلك مع جوزك قبل ما الحكاية تقلب بينا لحد.

سوزان: شكلي أنا اللي حبيتك إنما إنت وقفت عند

مرحلة الصباح دي وبس

مراد: بس يا مجنونة متخرّفيش في كلامك... مش

بحبك أيه إنت كمان!! أمّال مقابلاتنا دي كلها اللي

حصلت تسميها أيه!!

سوزان: أسميها نزوة أو لحظة متعة بترتاح فيها شوية

من تعبك طول اليوم.

مراد: إنت شيفاها كده؟!

سوزان: إنت شايفها غير كده!! واحدة شأطتها من

العيادة واتصاحبتوا ع انت وجمعكم في الآخر البحث

عن المتعة... يبقى أفرق أيه أنا عن أي واحدة جبتها من

الشارع قضيت معاها ليلة وف الآخر عطيتها اللي فيه

النصيب.

مراد: وأنا بقى عطيتك اللي فيه النصيب وألا لسه؟

٥٢ ————— القائل الحقيقي

سوزان: الحساب مدفوع مقدماً يا دكتور... أنا اللي جريت وراك من الأول لما ارتاحتك وحسيت إني حبيتك.
مراد: يبقى إنت اللي شأطيني من الشارع مش العكس.

سوزان: تصدق صح وكده ليك حساب عندي ولازم أدفعه.

مراد: يبقى تيجي النهاردة العيادة تدفعي حق الكشف وتدخلني في دورك بس تعالي متأخر عشان تدخلني آخر واحدة.

سوزان: طب ماكان من الأول!!

مراد: لأ معلش أنا بحب أتهزق من حبيبتني وأحس أدأيه أنا واطي وحيوان وإن هي بتضحني بحياتها وبيتها وسمعتها عشان بتحبني في الوقت اللي أنا مش عارف أقولها اطلقي ونتجوز.

سوزان: أنا عارفة إن العمدة مستحيل هيوافق على جوازك من واحدة مطلقة.

مراد: سوزان.

سوزان: نعم يا حبيبي؟

مراد: احنا كده مش صح... احنا بنعمل الغلط عشان

خايفين من العبد بس بخوفنا ده بنغضب ربنا.

سوزان: مش فاهمة يا حبيبي.

مراد: احنا بنعمل اللي يخلي ربنا يغضب علينا ويهز

عرشه من فوق سبع سماوات عشان العمدة يكون

راضي عني مع إن في الآخرة أنا وإن هتتاسب

لوحدنا بعيد عنه.

سوزان: طب والحل؟

مراد: اطلقي.

سوزان: وبعدين؟!

مراد: هتجوزك... هتجوزك حتى لو بعلم أهلك بس

من غير أهلي مايعرفوا

سوزان: بابا مش هيوافق أتجوز في السر.

مراد: لَمَّا يلاقي بنته مطلقة ومتقدم لها عريس تاني

القائد الحقيقي

سوزان: حبيبي أنا بحبك من وأنا في بيت أهلي
وقولتلك الكلام ده قبل كده بس إنت اللي نسيت أو
عامل نفسك ناسي وعشان كده جيتلك العيادة بعد ما
اتجوزت لَمَّا وحشتني وكان نفسي أشوفك وده اللي
خلاني أطلب منك أمنع الحمل عشان مش عارفة أحب
جوزي وعارفة إني مستحيل أقدر أكمل معاه.

مراد: طب ما أنا بقولك اطلقي أهو وأنا أتجوزك!!
سوزان: في السر؟!... عايز تتجوزني في السريا
مراد؟!!

مراد: مش أحسن من اللي بنعمله مع بعض في السر
برضه.

سوزان: ماشي يا مراد... بس وحياة حبي ليك... لو
غدرت بيا بعد ما اطلق لأكون قاتلاك بإيدي وأنا كده
كده داخله النار.

مراد: لا حول ولا قوة إلا بالله... حد يقول أنا داخل
النار!!

٥٦ ————— القائل الحقيقي

سوزان: وهو اللي بنعمله مع بعض ده ميدخلناش النار؟!!!

مراد: مقولتك هنصلح غلطنا خلاص وهنتوب...
غلطت أنا!!

سوزان (مستسلمة بعد فترة صمت): لأ... مش غلطان.

مراد: يبقى تبدأي تنفذي اللي قولتك عليه لحد ماتطلقي على ماتكون قضية سها دي خلصت والدنيا هدبت من حوالينا ولحد الوقت ده ميعدي مش هنتقابل.
سوزان: مراد.

مراد: حبييتي أنا هقفل معاكِ عشان وصلت المستشفى خلاص... سلام يا قلبي.
سوزان (خاضعة): سلام يا حبيبي.
مراد: بحبك.

سوزان (دامعة): وأنا كمان بحبك.



الفصل السادس

شهادة جديدة



عاد الشباب إلى منزلهم في المساء واجتمعوا على
العشاء كالعادة...

علي: شوفتوا اللي حصل!!

مروان: خير؟؟

علي: أستاذ عبد الغفار أبو سها الله يرحمها طلبني
النهاردة وعايزني أمسكه القضية.

عمر: ووافقت؟

علي: طبعاً.

مراد: بس إنت موقفك صعب لسبيين الأولاني إننا
مشكوك في أمرنا لحد دلوقتي على الأقل من النيابة
والمباحث، والسبب الثاني إن كريم هو كمان مشكوك
فيه ولو ثبتت عليه هتعيش في عداوة هنا مع أهله.

علي: كوني أقبل القضية ف ده ضروري عشان أتابع
الموقف من قريب وعشان ميتقالش إني رفضتها لأن

٥٨ — القاتل الحقيقي

على راسي بطحة أنا وأخواتي... أما بالنسبة ل كريم ف
أهله عارفين كويس إن الحق حبيب الله.

لؤي: يعني قبلتها خلاص؟

علي: أيوه وطلبت كمان سهيلة للشهادة.

مراد: ليه؟

علي: لأنها صاحبتها الأتيم وكانت بتكلمها على
طول من البلكونة.

لؤي: لو أثبت إن كريم شهادته غلط ده هيساعدك في
إنك تثبتها عليه بعد كده؟

مروان: مش شرط على فكرة.

عمر: يقولك القاتل دخل لحد أوضة نومها بسهولة
وأكيد هي مش هبلة عشان تدخله بهدوء كده!!

لؤي: ممكن تحت تهديد السلاح.

علي: ماتت مخنوقة وملقوش سلاح في المكان
والوقت كان ضيق إن القاتل يركز هو داخل بأيه وخارج
بأيه.

القائد الحقيقي

عمر (مستقر البال): معنى كده إن كريم فعلاً
مُستبعد يكون هو القاتل.

لؤي: خلاص نشيلها احنا وبقى حد فينا هو اللي
قتلها!!

مروان: مش معنى إن كريم مش هو القاتل يبقى حد
فينا هو القاتل.

علي: فعلاً وعشان كده أنا طلبت شهادة سهيلة بس
هي تعبانة من ساعة ما عرفت خبر الحادثة والدكتور
مانع سؤالها دلوقتي.

عمر (حزيناً): الخبر ده كسر وسط الواحد والله...
الله يرحمها.

بعدها أفاقت سهيلة من صدمتها ذهبت إلى سراي
النيابة لتُدلي بشهادتها...

سهيلة: يوم الحادثة طلعت البلكونة في الميعاد بتاعنا
زي كل يوم عشان أطمئن عليها... فقالتلي إن باباها
ومامتها مسافرين البلد عشان حصلت حالة وفاة
ورايحين يعزوا فيها.

القائد الحقيقي

وكيل النيابة: يعني هي كانت بتشاورك إنت؟
سهيلة: أيوه طبعاً.

وكيل النيابة: طب مش وارد إنها شاورت لخطيبها
قبلك أو بعدك؟

سهيلة: لأ طبعاً مستحيل!! الخطوبة كانت في السر
محدث يعرف عنها حاجة... يعني لو حد شافها
بتشاورله هيقول عليها أخلاقها وحشة... ده غير إن
كريم كان راشق عينه على بلكونتها طول الوقت.

وكيل النيابة: تفتكري كريم يكون هو القاتل؟
سهيلة: الله أعلم بس معتقدش.

وكيل النيابة: ليه؟

سهيلة: كريم بيحبها طول عمره وكلنا عارفين كده
كويس ومستحيل يعمل فيها كده.

وكيل النيابة: بس هو دلوقتي اتغير.

سهيلة: لو كان ناوي يعمل حاجة مكانش شهّد

القائد الحقيقي

الشارع كله عليه إنه ناوي يأذيها... اللي بيعمل
مبيقولش واللي بيقول مبيعملش.

وكيل النيابة: علاقتها بخطيبتها الجديد كانت
كويسة؟

سهيلة: جداً... كان بيتمنالها الرضا ترضى.

وكيل النيابة: كان يقابلها بره لو حدهم؟

سهيلة: لا لا... باباها لو كان شم خبر بحاجة زي
دي كان قتلها هو شخصياً.

وكيل النيابة: هو باباها كان صعب قوي كده؟

سهيلة: بنته الوحيدة اللي جابها بعد شوقه.

وكيل النيابة: طب خطيبتها كان بيتواصل معاها

إزاي؟

سهيلة: عن طريقي... كنت لما بروحها برن عليه

فيكلمها على فوني.

وكيل النيابة: هي حبت مين فيهم أكثر؟

سهيلة: لؤي.

وكيل النيابة: ليه؟

سهيلة: ابن ناس كده نص عمره مقضييه في أوروبا...

كلامه معسول ولبسه جميل وشكله خواجاتي وذوق
ذوق ذوق مش عارفة أقول لحضرتك أد أيه.

وكيل النيابة: طب لَمَّا خطيبها راقني بالشكل ده

وكريم مهووس بحبها للدرجة دي... يبقى مين اللي
قتلها؟!

سهيلة (باكية): مش عارفة أنا هتجنن من ساعة اللي

حصل.

بعد شهادة سهيلة عاد الرائد أحمد والنقيب مُهيب

إلى كريم في منزله ليُعيد عليهم ما رآه يوم الحادث...

الرائد أحمد: وريني الحكاية زي مشوفتها يومها يا

كريم.

بعد أن روى كريم القصة من جديد وهو يشير لهم

على جهاز الحاسب الآلي الخاص به...

النقيب مُهيب: بس كده تبقى إنت شهدت غلط.

كريم (مُندهشًا): إزاي؟

النقيب مُهيب: شاشة اللاب بتاعك في الحالة دي

كانت زي المراية يعني اللي تشوفه فيها شمال يبقى هو

في الأصل يمين بالانعكاس.

الرائد أحمد: مين اللي في اليمين بالنسبالك يا كريم؟

كريم (مُصابًا بصدمة): سهيلة!!

النقيب مُهيب: متهيألي يا بشمهندس إنت كده

محتاج تراجع الدكتور بتاعك في موضوع التركيز ده بدل

ماكنت هتجيب لبريء إعدادم.

كريم: وكتاب الله أنا مبقتش أهلوس خلاص.

الرائد أحمد: يمكن نحتاجك تاني للشهادة في أي

وقت يا بشمهندس.

كريم: تحت أمر حضرتك.

انهار كريم من جديد بعد رحيل ضابطي المباحث
من منزله واستدعت حالته أن يعود للمشفى من جديد
ليبقى تحت الملاحظة للاطمئنان على حالته، ولكن
بعد وضعه تحت الملاحظة جاء تقرير المشفى بأن
حالته أصبحت مستقرة وأنه لا يُعاني من أي هلاوس.



الفصل السابع

مُنْهَم جَدِيد



عندما استدعت النيابة أسرة كريم للشهادة فيما يخص علاقته بسها وذلك أثناء تواجده في المشفى في فترة الملاحظة...

وكيل النيابة: أستاذ عبد الغفار بـ يتهم ابنك إن هو اللي قتل سها بنته.

بثينة (والدة كريم باكية): ابني أغلب من الغلب والدنيا حطت عليه بالجامد قوي.

وكيل النيابة: عشان كده طلّع غلبه في سها وقتلها؟!
 بثينة: مستحيل ابني يعمل حاجة زي دي... ومش
 عشان ابني وربنا... إنما أنا عمري ما شوفت واحد
 بيحب واحدة زي ما كان كريم بيحب سها الله
 يرحمها... منهم لله ولاد الحرام اللي غاوه وسحبوه
 للطريق الوحش.

وكيل النيابة: كريم مبقاش طبعي من بعد إدمانه
 للترامادول وده ممكن يكون خلاه قتلها في لحظة هلوسة.
 بُثينة (مُنهمرة في البكاء): والله العظيم ابني كان خف
 وبقى زي الفل... الوقت اللي قال إنه قام من قدام
 اللاب عشان يعمل حاجة كان بيساعدني في شغل البيت
 لإني كنت واقعة على رجلي ومش قادرة أتحرك...
 وأخته كان عندها امتحان ومرضيش يخليها تسبب
 مذاكرتها وتساعدني... فقام هو خلّص شغل البيت
 بدالي ورجع قعد على سريره عشان يرتاح من المجهود
 اللي عمله بس اتكسف يقول كده في التحقيقات... ابني
 حنين قوي وربنا.

وكيل النيابة لإيمان أخت كريم: تفتكرى كريم يكون
 هو اللي قتلها؟

إيمان: لأ طبعاً مستحيل... أخويا ده قلبه رُهيف
 طول عمره وده سبب بلوته من الأول خالص.

وكيل النيابة: إزاي؟!

القائد الحقيقي

إيمان: والدنا متوفي وأختي الكبيرة رجاء كانت متجوزة قبل بابا الله يرحمه ما يموت، كانت كارهة جوزها بس مش قادرة تتكلم طول ما بابا كان عايش عشان كان صاحب مرض وخافت يتقهر لما تطلق.

وكيل النيابة: وبعدين؟

إيمان: بعد بابا ما مات،.

وكيل النيابة: الله يرحمه... حصل أيه؟

إيمان: ما أنا بحكي لحضرتك أهو... رجاء أختي طلبت الطلاق وجوزها على أد ما كان حيوان معاها في معاملته اليومية بس كان بيحبها بجنون... فحبسها في البيت ومنعنا من بعض... عاملها معاملة غير آدمية من إهانات وشتايم وضرب وهددها إنها لو خرجت من بيته هيحرمها من ولادها.

وكيل النيابة: مش من حقه.

إيمان: قالها هيثبت بشهود من عنده إنها غير سالحة

لرعاية الأولاد وكده تسقط حضانتها لولادها وحضانة ماما
كمان كجدة ليهم... وهي نقطة ضعفها الوحيدة الولاد.

وكيل النيابة: وده كان سبب بلوة أخوكي إزاي؟

إيمان: حالتها كانت بتسوء يوم بعد يوم وكريم
حاسس إنه متكفف مش عارف ينقذها وهو راجلنا
دلوقتي من بعد بابا الله يرحمه.

وكيل النيابة: هو اتعاطى الترامادول للسبب ده؟

إيمان: أيوه... ضغطه كان على طول عالي بسبب
الموضوع ده وكان بيشتكي من صداع مزمن طول
الوقت... ولاد الحرام دخلوله من السكة دي.

وكيل النيابة: وهو كده عرف يساعدها؟!

إيمان: بالعكس... بعد ما جوز أختي عرف اللي
حصله بقى بيهددها أكثر بفرصة فوزه بالولاد لو فكرت
تخلعه بعد مارفض الطلاق لإن عيلتها كلها بقت غير
أمانة على مستقبل الولاد.

وكيل النيابة: تفتكري لو مش كريم هو اللي

عملها... يبقى مين؟

إيمان (مرتبكة): شادي.

وكيل النيابة: شادي مين؟

إيمان: صاحب أمير أخويا الصغير... معاه في المدرسة.

وكيل النيابة: طالب في ثانوية عامة هيعمل كده ليه؟

وأيه علاقته بيها أصلاً؟!

إيمان: أنا هفهم حضرتك بالراحة.

وكيل النيابة: أتفضلي.

إيمان: كريم لما دخل المستشفى... شادي كان

بيجي البيت عندنا يزور أمير وكان بياخده أوضة كريم

عشان يستعملوا اللاب بتاعه، وفي مرة وأنا على باب

الأوضة دخلهم بالعصير سمعت أمير بيقوله...

"الله يخرب بيتك هتودينا في داهية!! أيه اللي إنت

بتعمله ده؟"

شادي: أخذت الصور بتاعة القمر دي كوبي.

أمير: بس كده عيب إنت ناسي إنها كانت خطيبة

أخويا!!

القائد الحقيقي

شادي: لأ يا ظريف في تليفون بيتهم.
وكيل النيابة: قصدك يكون استغل غياب أهلها
وظلعلها البيت يهددها؟
إيمان: ممكن.

وكيل النيابة: طب وهدّخله أساساً من باب الشقة
ليه؟!؟

إيمان: شادي جعجاع وصوته عالي وأكيد ورّأها
الصور اللي مبركها وهددها فاستصغرتة عشان سنه
وقالت طايش وممكن الكلام معاه بالراحة يجيب نتيجة
ويرجع عن آذاها.

وكيل النيابة: تدخّله عشان خافت من صوته العالي
وقالت هتضحك عليه بكلمتين عشان صغير جايز...
إنما لحد أوضة النوم!! مش شايفة إن ده فرض بعيد
شوية؟!؟

إيمان: مش عارفة... يمكن هدّدها بسلاح أو
سكينة... حضرتك استدعيه هنا واسأله.

و بتفتيش بيت شادي تم العثور على صور سها على جهاز الحاسب الآلي الخاص به وكذلك على هاتفه المحمول...

الرائد أحمد: الصور دي بتعمل عندك أيه يا شادي؟
شادي: عادي... دي صور عادية ممكن تلاقيها حضرتك عند أي حد من أصحابها.
النقيب مُهيب: تقدر تثبت كنت فين وقت وقوع الجريمة؟

شادي: كنت بتمشّي في وسط البلد بعد ما خلصت درس الفرنش.

الرائد أحمد: لو حدك؟

شادي: أه.

النقيب مُهيب: ليه؟

شادي: اتخانقت مع صاحبي بعد الدرس ومرضيتش أروّح البيت وأنا مخنوق ف قولت أتمشّي شوية الأول أفك زهق وبعدين أروّح البيت، وبالطبع لم

القائد الحقيقى

يستطع شادي إثبات دليل قاطع على عدم ارتكابه للجريمة مع توافر صورها لديه مما جعل النيابة تأمر بأخذ بصماته وحبسه أربعة أيام على ذمة التحقيق والتجديد في الميعاد مع مراعاة أنه لا زال قاصرًا حتى لا يتم احتجازه مع المُخضرمين من المجرمين.



الفصل الثامن

حادثة جديد



أما على جانب آخر من التحقيقات في مقتل سها
فلقد ذهبت سناء إلى مروان في شركته السياحية...
مروان: أهلاً أهلاً بست الكل خطوة عزيزة.

سناء (في حالة شديدة من الضيق): مبردش على
فوناتي ليه يا مروان؟

مروان: حبيبة قلبي مالها داخله حامية عليا كده ليه
بس؟!!

سناء (منفعلة): بقولك أيه... برود الفلاحين بتاعك
ده أنا مبجهوش ف ماتنرفزنيش أكثر ما أنا متنرفذة.

مروان: ولما إنت مش بتحبيه أمال إتجوزتيني ليه
وإنت عارفة من الأول إن أنا فلاح؟!!

سناء: طب الحمد لله إنك لسه فاكر إنك جوزي!!
والله كنت خايفة تكون نسيت الحكاية دي.

مروان: وليه كلام التقطيم ده وإنت عارفة اللي

فيها؟!

سناء: أه وعارفة كمان إن إنت إمبراح كنت مع
صحابك بتلعب قمار وعشان كده مكنتش معبرني طول
الليل وأنا عمالة أتصل بيك.

مروان: يعني أرد عليك وأنا معايا ناس ويعرفوا
سرنا!!

سناء: لأ متردش وأولع أنا لو كنت بموت وبستنجد بيك.
مروان: تموتي أيه يا قلبي!! ما أنت واقفة قدامي زي
الفل أهو.

سناء: ده ردك اللي إنت مجهزه عشان ترد بيه عليا؟!
مروان: لا حول ولا قوة إلا بالله!! يعني إنت عايزة
أيه دلوقتي بالظبط؟ أطلع الطبنجة أطخ نفسي عيار في
دماغي عشان ترتاحي؟!

سناء: لأ... عايزاك تطلع ورقة العرفي بتاعتنا
وتقطعها وأنا كمان هعمل زيك.

مروان (مُندهشًا): بالسهولة دي هنسيب بعض

القائد الحقيقي

مروان: كنتي هتدخلي حد من أفراد أمن العمارة
معاه عندك.

سناء: أه ويبقى دخلت راجلين بدل مادخلت راجل.

مروان: أمال اتصرفتي إزاي لمّا رأيي مش عاجبك؟
سناء: كلمت مؤمن.

مروان: طليقتك؟!!

سناء: أبو ولادي اللي جيه على ملا وشه أول
ما عرف إن البنت تعبانة بعد ماراح للدكتور جابه من بيته
عشان فون الدكتور كان مقفول.

مروان: جيبتي مؤمن عندك؟!!

سناء: يعنى أسيب بنتي تموت وإنت مش فاضيلي!!
مروان: أه أنا مش فاضيلك فتجيبي اللي فاضيلك
ورهن إشارة منك عشان ترجعوا لبعض... وطبعاً
عشان كده إنت جاية تقطّعي ورقة العرفي دلوقتي بعد ما
أحلو في عنيك من جديد بعد شهامة امبارح وأولع أنا.

القائد الحقيقي

سناء: بلاش قلة أدب واحترم نفسك... أنا مش قطة
في الشارع عشان أقضيها مع اللي ألاقه فاضيلي يا
محترم وإلا اتجوزتني ليه وإنت عارف إن أخلاقي
واطية قوي كده.

مروان: كان نفسي فيك.

سناء: ودلوقتي؟!

مروان: مبحش أكل من طبق حد بصلي فيه.

سناء: يعني أيه؟

مروان: يعني إنت طالق وورقتك تتقطع حالاً يا

مدام.

سناء (مصدومة): كأنك كنت مستنيها ومصدقت إني

أطلبها!! رخيصة قوي عندك أنا بالشكل ده؟!

مروان: إنت اللي طلبتي وأنا مفرضش نفسي على

حد مش مالي عينه.

سناء: مين قال إنك مش مالي عيني؟!

مروان: لَمَّا مَبَقَاش الضهر والسند وقت
متحتاجيني... أبقى كده راجل قدامك؟! لَمَّا تنبهرى
بشهامة طليقك في الوقت اللي مكنتش فاضيلك فيه
عشان بلعب شوية مع صحابي أفك بيهم عن نفسي بدل
ما أنهار من الاكتئاب والقلق اللي عايش فيه اليومين
دول وأنا محروم منك... أبقى كده مالي عنيك؟!!!
سناء: أنا....

مروان: إنت طالق وإتكلي على الله من هنا خلاص.
سناء (لا تستوعب مدى رخصها عنده): إنت
للدراجادي بايع؟!!

مروان (بسخرية): ياااااااااااااااااااا... أيه اللت والعجن
الكثير ده؟! إنت أصولك من الفلاحين وأنا معرفش يا
هانم يا بنت الأعيان والبشوات وألا أيه!!
سناء: ماشي يا مروان... إنت صحيح طَلَّقْتَنِي
وقطَّعت ورقة جوازنا خلاص... بس ورقتي أنا لسه
معايا.

القائد الحقيقي

مروان: هتعملي بيها أيه يعني؟! هتطلبيني في بيت
الطاعة مثلاً!!

سناء: لأ هطلبك في بيت أبوك العمدة عشان يعرف
إنت واطي أد أيه وبتعمل أيه مع بنات الناس بعد
ماتزهق منهم.

مروان: وهتعرفي بيت أبويا العمدة منين إن شاء الله!!
أعلى ما في خيلك اركبيه يا قطة.

سناء: أنا مش قطة ولا أنت واخدني من الشارع يا
أستاذ مروان... والخيل ده بقى نبقى نركبه سوا في
اسطبل أبوك العمدة في البلد زي ما كنت معشمني بإنك
هتركب هولتي يوم ماتبقى راجل وتعرف تواجه أبوك
بجوازنا.

مروان (مُقترباً منها): أنا راجل غصب عنك وعن
عيلتك كلها.

وانهال مروان عليها بالضرب المبرح والذي تم نقلها

القائد الحقيقي

على أثره إلى غرفة الرعاية المُشددة بإحدى المستشفيات وهي مصابة بارتجاج في المخ، وقامت المستشفى بتبليغ الشرطة وكذلك تم تبليغ أهلها وبالطبع عَلم مؤمن بما حدث لها، وكما كانت متوقعة وخائفة منذ البداية فقد أقام مؤمن فور شفاؤها قضية ضم الأطفال لحضائته لزوجها من مروان حيث ورقة الزواج العرفي الخاصة بها كانت لاتزال معها في حقيبتها وقت وقوع الحادث.

وعَلم العمدة بما جرى لولده مروان فجاء من البلدة ليتابع الموقف عن قرب ويحاول مع سناء أن تتنازل عن المحضر الذي حررته ضد مروان بالتعرض لها بالضرب بعدما علمت بأنه أصبح السبب في فقدانها لحضائته أطفالها...

علي: يا مدام سناء أنا همسك القضية اللي مؤمن طليقتك رافعها ضدك بضم الأطفال.

سناء: إنت فاهم كويس إن ورقة العرفي... اللي
أخدها من شنطتي لَمَّا كنت في المستشفى وفهم
الحكاية وعرف كنت بعمل أيه عند مروان في مكتبه...
هتخليه يكسب القضية.

العمدة: أنا هخلي علي يتفاهم معاه واللي هيطلبه
هياخده ويسيلك الولاد.

سناء: إنت فاهم إن مؤمن ده حد تافه ممكن تشتريه
بفلوسك... مؤمن ده ابن ناس أحسن منكم.

العمدة: احترمي نفسك... دلوقتي أنا فهمت هو
طلَّقك ليه من الأول ورماك لِكلاب السكك.

سناء: اللي ابنك كلب منهم!!

علي: يا مدام سناء احنا بنحاول نلم الموضوع مش
نكسب عداوات جديدة.

العمدة: لا جديدة ولا قديمة... خلاص يا علي...
الكلام معاه كده وقف... ويمين عظيم غليظ لكون

القائد الحقيقي

مطلع ابني من الحكاية دي صاغ سليم... يالا بينا.
سنا: طول عمرك مستبد وظالم... منك لله يا
شيخ... حسبي الله ونعم الوكيل.
وبالطبع علم العمدة عندما حضر لمتابعة قضية
مروان بأمر قضية سها وأن هناك اشتباه فيهم جميعاً أن
القاتل بينهم وخاصة لؤي.



الفصل التاسع كلمة الطب الشرعي



وجاء تقرير الطب الشرعي...

النقيب مُهيب: عرفت يا باشا تقرير الطب الشرعي

أيه اللي جه فيه؟

الرائد أحمد: البصمات اللي تم رفعها من مكان

الجريمة ما اطاققتش مع بصمات أي حد من اللي كانوا

متواجدين وقت اكتشاف الجريمة ولا كريم ولا الشباب

ولا شادي ولا أمير.

النقيب مُهيب (مندهشًا): أيه المفاجأة دي؟؟!! يعني

حتى مجهودنا في جمع بصمات أمير والشباب من غير

ما نشير شكهم عشان محدش فيهم ياخذ حذره لو له يد

في حاجة... طارت في الهوا!!

الرائد أحمد: خد دي بقي.

النقيب مُهيب: خير؟؟

الرائد أحمد: جه في التقرير إن ضوافر المجني عليها

تحتوي على أنسجة لجسم بشري
النقيب مُهيب: ده معناه إنها كانت بتقاوم القاتل وقت
خنقها وقامت بجرحه بضوافرها
الرائد أحمد: فيه حاجة أهم من كده بكثير.
النقيب مُهيب: خير يا باشا؟!
الرائد أحمد: جه في التقرير بإنها مش عذراء.
النقيب مُهيب (مصدومًا): مستحيل!! ده باباها
عامل عليها كماشة.
الرائد أحمد: الكلام ده حصل من وقت قريب
لوقوع الحادث لأن جرحها اللي حصل وقت فض
غشاء البكارة مكنش لحق يلتئم وقت الحادثة.
النقيب مُهيب: يعني اللي ارتكب الجريمة اغتصبها
قبل ما يقتلها؟؟
الرائد أحمد: لأ متعرضتش للاغتصاب وقت
ارتكاب الجريمة... الحكاية دي كانت قبل ارتكاب
الجريمة بساعات وكانت بالرضا مش بالغضب.
النقيب مُهيب (مستغرباً بشدة): تفتكر حضرتك أيه

اللي حصل لـ سها خلا حياتها اتقلبت كده ١٨٠ درجة
من بنت مُجتهدة مُلتزمة لقتيلة فاقدة عذريتها؟؟
الرائد أحمد: بقالك أد أيه ملعبتش بازل؟
النقيب مُهيب: نعم حضرتك!!
الرائد أحمد: بازل... بازل مسمعتش عنها قبل
كده!!

النقيب مُهيب: عارفها و كنت بحب ألعها قوي وأنا
صغير و كنت شاطر فيها و مكانتش بتاخذ معايا وقت.
الرائد أحمد: آخر قطعة بتحطها هي اللي بتكمل
الصورة.

النقيب مُهيب (مُتعبجاً من الحوار): تمام.
الرائد أحمد: بتبقى قدامك طول الوقت بس إنت
مستبعدها لأن شكلها ميو حيش إن كلمة النهاية متسطرة فيها
النقيب مُهيب: تمام برضه.
الرائد أحمد: مين الشخصية اللي احنا استبعدهاها
من التحقيقات لحد دلوقتي؟
النقيب مُهيب (بدون تردد): مامتها لأنها تعبانة من

ساعة اللي حصل ومن قبل الحادثة كمان.

الرائد أحمد: بمعنى؟

النقيب مُهيب: وهي جوزها مسافرين البلد جاتلها الأزمة في السكة وكانت ناسية العلاج في البيت... وطبعاً لأن جوزها بخيل فمرضيش يجيلها علاج جديد وكانوا لسه قريبين من البيت... فرجع بسرعة جابلها علاجها ونزل تاني جري علشان يلحقوا القطر بدل التذاكر متروح عليهم... فلما عرفت الخبر وهي في البلد تعبت زيادة... لمارجعت هنا دخلت العناية المركزة واتعملها قسطرة قلب.

الرائد أحمد: بقت كويسة دلوقتي؟

النقيب مُهيب: لسه طالعة من العناية من يومين.

الرائد أحمد: يبقى زيارتها واجب.

النقيب مُهيب: حضرتك صاحب واجب طول عمرك... بس أيه علاقتها باللي احنا كنا بنقله دلوقتي؟!

الرائد أحمد: آخر قطعة بازل أكيد عندها.

النقيب مُهيب: نعم؟!!

الرائد أحمد: لما يبقى الأب بالقسوة والشدة دي ومع ذلك البنت متفوقة وسلوك باباها مش مقصّر على نفسيتها ف ده معناه إن فيه أم صالحة محوّطة على بنتها وبتراعيها وفي حالة زي دي أكيد البنت مش بتخبي على مامتها أي حاجة.

النقيب مُهيب: إلا إنها تقول لمامتها إنها غلطت مع واحد... ده غير إن واحدة شخصيتها اتحولت بالشكل ده... يبقى منطقي إنها تبدأ تخبي على مامتها ويكون ضميرها مرتاح كمان... وبعدين لو الحكاية مجرد ساعات... ف ده معناه إن الوقت اللي حصل فيه الكلام ده تقريباً الفجر... يبقى خرجت من بيتهم إمتى ورجعت إمتى؟!!

الرائد أحمد: مش شرط تكون غلطت مع واحد فعلياً.

النقيب مُهيب: إزاي؟!!

القائد الحقيقي

الرائد أحمد: هو إنت يا حضرة الظابط إيه علاقتك
بالتكنولوجيا بالظبط؟

النقيب مُهيب: عادية بس مش متابع من ساعة
مشتغلت حضرتك.

الرائد أحمد: كده يبقى فاتك كتير وحاول تلحق
نفسك.

النقيب مُهيب: طب حضرتك مش هتفهمني بتفكر
في أيه بالظبط؟

الرائد أحمد: لَمَّا أتكلم مع مامتها وأطابقه باللي في
دماغي هبقى أقولك.



الفصل العاشر

شهادة الأم



الرائد أحمد: حمد لله على السلامة يا مدام فريدة
والبقاء لله.

فريدة: الدوام لله حضرتك.

الرائد أحمد: كنت محتاج أعرف منك شوية
حاجات عن سها بنتك الله يرحمها.

فريدة (باكية): لسه مش عارفة أقول الله يرحمها...
مش مصدقة إن بنتي خلاص ماتت وبقي يتقال عليها الله
يرحمها!!

النقيب مهيّب: حضرتك ست مؤمنة وموحّدة بالله.

فريدة: لا إله إلا الله... تحت أمر حضراتكم.

الرائد أحمد: مين كانت صاحبة سها الأنتيم؟

فريدة: سهيلة جارتنا... بس ده لحد فترة قريبة.

الرائد أحمد: اتخانقوا بعد كده؟

فريدة: لأ بس لَمَّا سها اتخطبت ل لؤي وكان شارط

القائد الحقيقي

علينا إن الموضوع ده يبقى سر بينا... اضطرت سها إنها تقصّر معاها عشان متبقاش بتتعامل معاها على غش.

الرائد أحمد: سهيلة قابلت الموقف ده إزاي؟

فريدة: سهيلة عارفة إن أهم حاجة عند سها هو المذاكرة فلما سها قالتلها إنها عايزة تركز الفترة الجاية في مذاكرتها عشان تعوّض فترة المشاكل بتاعة كريم... سهيلة معترضتش وكانت بتتصل بيها كل فترة على تليفون البيت تسلم وتقف على طول.

الرائد أحمد: يعنى محدش قالها حاجة على موضوع الخطوبة ده أكيد؟!

فريدة: أيوه.

الرائد أحمد: سها مكانش عندها تليفون محمول أو لاب أو تاب أو أي حاجة من الأجهزة دي؟

فريدة: لوّي لّمّا خطبها جابلها تاب هدية وهو اللي كان بيشحنهولها بالرصيد كل شوية.

الرائد أحمد: باباها كان عارف الموضوع ده؟!

القائد الحقيقي

فريدة: أيوه... وقتها لؤي أقنعه إن ده ضروري عشان ياخدوا على بعض مادام مش عارفين يتقابلوا لا جوه البيت ولا بره.

الرائد أحمد: كتي بتقعدى معاها وهي بتكلمه؟
فريدة: لأ كانت بتتكلم معاه وهي لوحدها... ده في الأول وفي الآخر بيتكلموا من بعيد لبعيد يعني مش قاعدة معاه عشان أخاف يحصل بينهم حاجة غلط لا سمح الله مع إني عارفة بنتي متربية إزاي.

الرائد أحمد: ولمّا كانت مخطوبة لكريم... كانوا بيقعدوا لوحدهم وألا معاكم؟
فريدة: كان مكتوب كتابهم يعني كانت مراته ف كنا بنسيبهم لوحدهم عادي.

الرائد أحمد: محدش قال حكاية كتب الكتاب دي قبل كده.

فريدة: ما هو كان كتب كتاب بس... وبعدين هي خلعتة بعد موضوع الترامادول.

القائد الحقيقي

الرائد أحمد: باباها كان حارمها من المصروف بخل
وإذا كان يخاف عليها إن الفلوس تتلف أخلاقها؟
فريدة: أنا بنتي متريبة كويسة ومهما مسكت من
فلوس فعملها ما هتتلف أخلاقها.
الرائد أحمد: تمام.

بعد انتهاء تلك المقابلة تم تحريرز التاب الخاص بـ
سها والعمل على فض محتوياته، كما أمرت النيابة
باستدعاء كل من كريم ولؤي وسهيلة وأستاذ عبد الغفار
في وقتٍ واحدٍ للشهادة من جديد فتواجه الجميع في
سراي النيابة...

كريم: أنا عايزك تعرف بس يا عمي إني والله العظيم
ماقتلت سها ولا كنت أجروء أعمل حاجة زي دي.
لؤي (بتهمكم): قالوا للحرامي أحلف.

كريم (موجهًا الكلام ل لؤي): أنا مش فاهم إنت بقيت
بتكرهني كده ليه!! المفروض أنا اللي أكرهك... إنت
اللي استغلّيت فترة تعبي وروححت خطبت خطيبي اللي

القائد الحقيقي

كنت بعشق التراب اللي بتمشي عليه وإنّ شاهد على
حبي ليها من أول يوم... أنا عمري ماخبيت عنك حاجة.

علي: مينفعش الكلام ده هنا يا شباب... بعد إذّنك يا
كريم تروح تقف جنب المحامي بتاعك.

كريم: يا أستاذ علي أنا كنت عايزه يصدقني بس!!

أستاذ عبد الغفار: خايف تتشّنق؟!

كريم: ياريت... حتى أوصل عند سها بسهولة عشان
أوصل معاها اللي أتقطع في الدنيا.

وفي داخل مكتب وكيل النيابة...

وكيل النيابة: عرفتي منين حكاية خطوبة سها ولؤي؟
سهيلة: منها.

وكيل النيابة: مامتها قالت إن سها خبت عليك
وماقالتلكيش؟

سهيلة: قالتلي بس كان سر بينا من ورا مامتها

وكيل النيابة: إنّ قولتي قبل كده إن لؤي كان

بيكلّمها على تليفونك وإنّ عندها؟

سهيلة: أيوه.

وكيل النيابة: بس مامتها قالت كان عندها تاب
بتتكلم معاه منه.

سهيلة: قبل مايتقدم لها كان كلمها على فوني عشان
يعرف شعورها من ناحيته قبل مايتقدم ويتكسف لو
رفضته هي أو أهلها.

وكيل النيابة: وجاب رقم تليفونك منين؟

سهيلة: كنت بتدرب عنده في مكتبه.

وكيل النيابة: إنتِ لسه قايلة عرفتي موضوع الخطوبة
منها ورجعتي قولتي كلمها على تليفونك قبل الخطوبة
عشان يسمع منها موافقة وألا لأ... مش شايفة تعارض
في الكلام ده!!

سهيلة (مرتبكة): لأ أبداً خالص... هو كلمها من
عندي يعرف رأيها وقالتله هفكر... بعد كده سكت وأنا
اتكسفت أسأله لأن علاقتي بيه مكانتش قوية للكلام في
الأمر الشخصية دي يعني... هو طلب خدمة وأنا
عملتها وبس... بعد كده هي اللي قالتلي من نفسها.

القائد الحقيقي

وكيل النيابة: طب مسألتيهاش هي ليه بعد ما كلمها
 من عندك؟ طبعي البنات ببقوا شغوفين جداً يتابعوا
 الأحداث أول بأول في المواضيع اللي زي دي!!
 سهيلة: أنا بطبعي مش حشرية... بسببها تحكي
 براحتها وقت ماتحب وأنا عارفة إنها في الآخر مستحيل
 تخبي عني أي حاجة.

وكيل النيابة: لما هي كان عندها تاب وتليفون
 أرضي أمال كنتوا بتتكلّموا من البلكونة ليه؟
 سهيلة: التاب كانت بتستعمله ل لؤي بس عشان هو
 اللي دافع حقه فكانت بتخاف تستعمله كثير عشان
 ميوظش... والتليفون الأرضي عندي كان بايظ وأنا
 اللي بطلبها عشان باباها مخليه عندهم استقبال بس
 ومكانش معاير صيد موبايل أكلّمها منه على
 الأرضي... ف كنا عاملين الميعاد ده ثابت نتكلم فيه من
 البلكونات في الطوارئ اللي زي دي.

وكيل النيابة: ما طلبت منك تروحي تقعدى معاها
بدل ماتقعد لوحدها؟

سهيلة: لأ هي من ساعة ماتخطبت اتفقت معايا نقل
مقابلات في البيت عندها عشان تركز في مذاكرتها في
الوقت اللي مش بتتكلم فيه مع لؤي.

وكيل النيابة: كانت بتتكلم معاه على التليفون بس؟
سهيلة: وفاير وواتس وماسنجر وكل حاجة.

وكيل النيابة: على اعتبار إنك صاحبها وسرها قوي
كده... حصل بينها هي ولؤي أو حتي بينها وبين كريم
أي علاقة خاصة؟

سهيلة (مرتبكة مرة أخرى): معرفش... احنا كنا
بتتكلم في كل حاجة إلا الموضوع ده.

وكيل النيابة: ليه؟

سهيلة: دي أسرار ودايمًا يقولوا اللي بين الراجل
ومراته زي اللي بين الميت والقبر محدش يعلمه إلا الله
وكيل النيابة: ونعم بالله... بس هي كانت مكتوب

القائد الحقيقي

كتابها مرة ومخطوبة مرة... يعني مكنش فيه جواز فعلي
 في المرتين عشان تقولي كلمة الراجل ومراته!!
 سهيلة (لا تعرف كيف ترد): برضه... حتى لو مجرد
 علاقة ارتباط فهي برضه حاجة خاصة مقدرش أتدخل فيها.
 وكيل النيابة: إنت مخطوبة؟
 سهيلة: لأ.

وكيل النيابة: مكنتيش بتزعلي إن سها العرسان
 رايعين جاين عليها وكمان بياخدوك واسطة ليها في
 حين إن محدش فيهم فكّر فيك إنت؟
 سهيلة: الحب والجواز رزق حضرتك زي الأكل
 والشرب والصحة والذرية.

وكيل النيابة: سهيلة كانت تعرف خبر خطوبتك إنت
 وسها؟
 لؤي: أيوه.

وكيل النيابة: من مين؟

لؤي: مني.

وكيل النيابة: قبل الخطوبة وألا بعدها؟

لؤي: قبل الخطوبة... هي اللي كانت واسطة بيني وبينهم... فلما بلغوني بالموافقة قولتلها.

وكيل النيابة: إنت وسهيلة كتتم تعرفوا بعض من قبل كده وألا ده كان أول تعامل بينكم؟

لؤي: سهيلة طالبة في فنون جميلة ومن ساعة ما دخلت الكلية جاتلي المكتب وطلبت مني تشتغل معايا عشان تكسب خبرة جنب الدراسة وأنا مكش عندي مانع في ده... أنا بحب الإنسان الطموح.

وكيل النيابة: مفكرتش تخطب سهيلة بدل سها؟

لؤي: فكرت بس لقيت شخصيتها مش متوافقة مع شخصيتي.

وكيل النيابة: طب هي حبتك؟

لؤي: دي حاجة تخصها... المهم مشاعري أنا كانت رايحة فين.

القائد الحقيقي

وكيل النيابة: إنت وسها كنتوا بتحبوا بعض؟

لؤي: جدًا.

وكيل النيابة: حصل بينكم أي علاقة خاصة في فترة

الخطوبة؟

لؤي: احنا مكناش بنتقابل أساسًا.

وكيل النيابة: ولا على أنت؟

لؤي (مصدومًا من السؤال): ده شغل مراهقين وأنا

أكبر من كده.

وكيل النيابة: إنت ولؤي أصحاب؟

كريم: كنا.

وكيل النيابة: وبعدين؟

كريم: بعد ما أدمنت الترامادول بعد عني بحجة أنه

خايف من عمه العمدة يعرف إنه مصاحب واحد مدمن.

وكيل النيابة: هو كان بيخاف من العمدة قوي كده؟

كريم: ولا أي خوف... لؤي مبيخافش من حد...

القائد الحقيقي

واحد مُلحد مبيخافش من اللي خلقه والعياذُ بالله...
هيخاف من عمه إزاي!!

وكيل النيابة: مين اللي قالك إنه مُلحد؟

كريم: هو... احنا كُنا أصحاب أنتيم.

وكيل النيابة: أُمّال تفتكر بعد عنك ليه في محنتك؟

كريم: وقتها مكنتش مركز عشان أدور على السبب

الحقيقي بس حالياً طبعاً فهمت.

وكيل النيابة: فهمت أيه؟

كريم: كان مصاحبني على غش من الأول خالص...

أحكيه عن حبي لسه فيحبها هو... أتعب أنا يروح
يخطبها هو.

وكيل النيابة: عرفت إنه خطبها إمتى؟

كريم: بعد ما اتقتلت الله يرحمها زي كل الناس

ماعرفت لما باباها قال.

وكيل النيابة: تعرف أيه عن علاقتها بسهولة؟

كريم: سهيلة طول عمرها بتغير من سها... بس سها

كانت بتكبر دماغها عشان معندهاش إخوات فكانت
واخداها أخت ليها.

وكيل النيابة: سهيلة قالت إنها كانت متعوّدة
تشاورها من البلكونة في ميعاد يومي... وأكد كونك
متابعها من الشباك بصفة مستمرة... تبقى كنت عارف
كده كويس.

كريم: مش صحيح... كان بقالهم فترة طويلة
ماعملوش كده... بحسبة صغيرة هيبقى من وقت ما
سها اتخطبت... وبعدين يومها لما شوفتها بتشاور على
شاشة اللاب... طلعت الشباك بس مشوفتش سهيلة
واقفة في بلكونتها.

وكيل النيابة: يمكن عشان إنت بصيت على الجنب
التاني ناحية شقة الشباب حسب تفكيرك ما فرض وقتها!!
كريم: جايز.

وكيل النيابة: وإنت وسها لما كنتم مخطوبين كانت
في حكم مراتك... حصل أي حاجة خاصة بينكم؟

القائد الحقيقي

كريم: لأ طبعًا... أنا عندي إخوات بنات وربنا يستر
على ولايانا... لو عملت معاها حاجة في السر هتردلي
في أخواتي.

وكيل النيابة: طب هي كان عندها استعداد تعمل ده
لو إنت كنت طلبته منها؟

كريم: سها بنت زي الجنيه الذهب.
وكيل النيابة: بس الطب الشرعي أثبت إنها عند
وفاتها مكانتش عذراء... وإنت أقرب حد يكون السبب
في ده.

كريم (منفعلًا): ورحمة أبويا ما حصل بينا أي حاجة
من الكلام ده خالص... وبعدين ممكن يكون القاتل
اغتصبها قبل ما يقتلها أو حتى بعد ماقتلها.

وكيل النيابة: أيه اللي خلاك تقول بعد ماقتلها دي؟!
كريم: لإن سها مستحيل توافق بحاجة زي دي حتى
لو بموتها فأغلب الظن يبقى ده اللي حصل.

وكيل النيابة: إنت رجعت البيت يوم الحادثة تجيب
علاج المدام؟

أستاذ عبد الغفار: أيوه.

وكيل النيابة: كانت سها كويسة وألا كان باين عليها
إنها متغيرة؟

أستاذ عبد الغفار: كانت قاعدة بتذاكر.

وكيل النيابة: إنت عارف إن لؤي كان جايلها تاب؟
أستاذ عبد الغفار: أيوه.

وكيل النيابة: بيتقال إنك شديد معاها ومانعها من
الاختلاط يبقى إزاي سمحتلها تستعمل التاب ده؟

أستاذ عبد الغفار (مستنكراً): ده خطيها وداخل البيت
من بابہ وبعدين ده عشان يتعرفوا على بعض من خلاله
مش أكثر زيہ زي التليفون... يعني مسبتهاش معاه في
أوضة لو حدهم وقفلت عليهم ومشيت لا سمح الله.

وكيل النيابة: تفتكر عملت معاه حاجة على النت
هي السبب في فقدها عذريتها؟

القائد الحقيقي

أستاذ عبد الغفار (منهاراً): مستحيل بنتي تكون
عملت حاجة زي دي... أكيد اللي قتلها هو اللي
اغتصبها... بنتي مستحيل تعمل كده... مستحيل.

وكيل النيابة: بس غشاء بكارتها تم فضه باليد.

أستاذ عبد الغفار: يعني أيه؟

وكيل النيابة: يعني لو اللي قتلها هو اللي عمل كده
يبقى جاي ينتقم منها أو تكون حضرتك شخصياً أذيته
في حاجة كبيرة زي دي قبل كده.

أستاذ عبد الغفار: يشهد علينا ربنا إن عمري ما عرفت
واحدة ست غير الست أم سها.

أمر وكيل النيابة بتحويل كريم ولؤي وسهيلة وأستاذ
عبد الغفار للطب الشرعي للكشف الطبي عليهم وأخذ
عينة من نسيج بشرتهم لمضاهاتها بالأنسجة المتواجدة
في أظافر سها وقت وقوع الحادث...

عمر: طب سهيلة ممكن تكون غارت منها وكانت

خناقة بنات... لوئي ممكن يكون طمع في جمالها
وشبابها وحاول يراودها عن نفسها فكانت بتدافع عن
نفسها... كريم ممكن كان عايز ينتقم منها... إنما باباها
أستاذ عبد الغفار النيابة تشك فيه ليه؟؟

علي: وكيل النيابة يشك إن باباها لَمَّا رجع البيت
لقاها في وضع مشين وده استفزه وخلاه يخرج عن
صوابه لحد ملقاها ميتة بين إيديه.

كما تم تحريز جهاز الحاسب الآلي الخاص بكل
من لوئي وكريم وسهيلة وتفرغ محتويات هذه
الأجهزة، وكذلك العودة لشبكات المحمول الثلاثة
لمتابعة مكالماتهم في الفترة الأخيرة، وأيضاً رصد كل
المكالمات الواردة للهاتف الأرضي في منزل سها
وحبس كلاً من كريم ولوئي وأستاذ عبد الغفار أربعة
أيام على ذمة التحقيق.



الفصل الحادي عشر

قرارات العمدة



العمدة: يعني لؤي كده بقى مُتهم؟

علي: أيوه يا حاج.

العمدة: يبقى إنت لازم تدافع عنه.

علي: هو لسه متهم ومثبتش عليه حاجة.

العمدة: وإنت لسه هتستنى لما يثبت عليه حاجة؟

مروان: يا علي... لؤي لو عدّي من قضية القتل

فقضية فض غشاء بكارتها موجودة.

مراد: لسه برضه مثبتش عليه... وحتى لو ثبتت

فاللي اتفض غشائها ماتت خلاص.

مروان: لسه أبوها موجود والبنت كانت لسه قاصر

ماجابتش ٢١ سنة.

عمر: إنتوا ناسيين إن علي هو المحامي بتاع أسرة

سها الله يرحمها!!

علي: أستاذ عبد الغفار سحبها من مكثبي النهاردة

الصبح.

مروان: بيّفهم.

عمر: أكيد عشان يزيل الحرج عن علي.

العمدة: ولا حتى زعلان عشان بنته... هو بناتهم

يعملوا الغلط بمزاجهم وييجوا يشيلونا احنا ذنبهم!!

عمر: يا حاج... سها الله يرحمها كانت حته جوهره والله.

العمدة: أمّال فرّطت في نفسها بالسهولة دي ازاي؟!

عمر: الله أعلم باللي جرى يا حاج... يعني ممكن اللي

قتلها يكون هو اللي فضه قبل ما يقتلها أو حتى بعد ما قتلها.

علي: استعجال اللي قتلها في النزول يبين إنه قتلها

غلط أصلاً أو مضطر بعد مشادة كلامية حصلت بينهم

مثلاً... وده معناه إنه ملحقش يعمل أكثر من كده لا قبل

قتلها ولا حتى بعده... ده غير إن البنت كانت بكامل

لبسها لما جيرانها دخلوا عليها ومع فرضية استعجال

القاتل فأكيد ملحقش يعمل كده ويلبسها هدومها

تاني... وكمان الطب الشرعي أثبت إن الفض كان قبل

القتل بساعات.

القائد الحقيقي

العمدة (ناقماً): تعرف تسكت إنت... طول النهار
البتت زي الذهب وزي الزفت الألماظ... وابن عمك
مفيش كلمة واحدة حلوة قادر تقولها في حقه!!
عمر: الحق أحق بأن يُتبع.

العمدة (مُنفِعلاً): قوم إمشي من قدامي يا ولا قبل ما
اتهور وأعمل اللي عمري ماعملته معاك قبل كده... إمشي.
مروان: بالراحة عليه يا حاج... كلنا عارفين إن سها
دي مش أول واحدة لئوي يعمل معاها كده... فيه كتير
عمل معاها أسوأ من كده وكانوا بيروحوا يعملوا
عمليات إجهاض بعد كده في المستشفى عند مراد.
مراد (مُندهشاً): عندي أنا!!

مروان: أيوه... بس دكاترة صغيرين عندك هما اللي
كانوا بيعملوها عشان كنا بنقولهم إن إنت اللي باعتنا
ليهم ومش عايز تبان في الصورة.

مراد (مُنفِعلاً): الله يخرب بيوتكم... يعني أنا ماشي
بما يُرضي الله وإنتوا بتبوظوا سمعتي من ورايا!!

القائد الحقيقي

مروان: متاخدهاش على صدرك قوي كده.
مراد (غاضبًا): أمّال أخدها إزاي دي؟! ومكنتوش
بتعملوا ريتاج بالمرّة؟!!

مروان: لأ هو كانوا بيخلّص نفسه من الحمل
وبس... وهما بعد كده يشيلوا هم أنفسهم... كان يقول
هما اللي فرّطوا بمزاجهم يبقى يستحملوا نتيجة التفريط
ده.

العمدة: بكرة يا علي تنزل تشوف ابن عمك بصفتك
المحامي بتاعه... أنا كده وكتك معاه خلاص.

علي: اللي تؤمر بيه يا حاج
مراد: مش هتقول لعمي معتز يا حاج عشان ييجي
من البلد يقف جنب ابنه؟

العمدة: خلاص كلمه يا مراد خليه يسب المستشفى
هناك في البلد لأي دكتور ثقة شغال عنده وييجي هو
ويعمل حسابه يمكن المدة تطوّل هنا شوية.
مراد: حاضر يا عمي.

الفصل الثاني عشر

من القائد؟!



دخل الرائد أحمد إلى مكتبه في الصباح بعدما أخذ
أجازة استثنائية لمدة يوم لإجراء عملية جراحية لابنته؛
فجاء له على الفور النقيب مُهيب ليُبلغه بنتيجة تقرير
الطب الشرعي...

النقيب مُهيب: حمدالله على سلامة الأمورة الصغيرة
يا فندم.

الرائد أحمد: الله يسلمك.

النقيب مُهيب: تقرير الطب الشرعي ظهر ومش
هتصدق حضرتك مين اللي قتلها.

الرائد أحمد: سهيلة.

النقيب مُهيب: و حضرتك عرفت مين؟

الرائد أحمد: كذبت... قالت إنها كانت الواسطة بين
لؤي وسها من الأول خالص في حين إن والدة سها

القائد الحقيقي

أكدت إن بنتها بعدت عن سهيلة عشان متعرفهاش
حاجة عن الخطوبة دي.

النقيب مُهيب: طب ما يمكن كانت سها ضاحكة
على مامتها؟! وخصوصاً إن لؤي أكد كلامها بأنها
كانت الواسطة ما بينهم.

الرائد أحمد: قال إنها عرفت منه قبل الخطوبة...
سهيلة نفسها قالت إنها عرفت من سها بعد الخطوبة لأن
علاقتها ب لؤي مكانش تسمح بإنها تتدخل في تفاصيله
أكثر من كده.

النقيب مُهيب: قصد حضرتك أيه؟

الرائد أحمد: لؤي مسلمنا سهيلة تسليم أهالي
والتقرير اللي في أيديك يقول إن كلامي صح...
مضبوط؟!!

النقيب مُهيب: طول عمرك باشا... طب عارف مين
اللي مارست معاه الزنا عبر الإنترنت؟
الرائد أحمد: لؤي.

النقيب مُهيب (مُعجَباً بفراسته): كانت واضحة ها!!
الرائد أحمد: كريم كان خاطبها ومع ذلك طول فترة
الخطوبة مجاش جنبها وهي في حكم مراته... يبقى
إزاي يعرف يقنعها إنها تعمل في نفسها حاجة زي دي
بعد كل المشاكل اللي حصلت ما بينهم... وبعدين
الموضوع ده عايز كاريزما عالية ماتتوفرش إلا في واحد
زي لؤي.

النقيب مُهيب (مُنبراً بذكائه): طب حضرتك عارف
بقي سهيلة عملت كده ليه؟

الرائد أحمد: القتل حصل صباحية اللي عملته مع
لؤي... يبقى أكيد الخناقة كانت عليه.

النقيب مُهيب: فعلاً ده اللي حصل... واضح إن
مش سها لو حدها اللي لؤي ضحك عليها.

الرائد أحمد: عشان كده قولتلك مسلمها لنا تسليم
أهالي... عشان يخلص منها هي كمان بالمرة.

النقيب مُهيب: كده هتتقدم قتل خطأ.

الرائد أحمد: فعلاً.

النقيب مُهيب: أبو سها وأبو سهيلة حلفوا إن لو المحكمة مجابتش حق بناتهم من لؤي... هما هيحيبوا حق بناتهم بنفسهم.

الرائد أحمد: اتفقوا مع بعض وهما خصمين في قضية واحدة!!

النقيب مُهيب: لأ يا فندم... كل واحد لو حده.

الرائد أحمد: كده يبقى هُدر دمه وتفرّق بين القبائل.

النقيب مُهيب: حقيقي يا فندم وخصوصاً إن النيابة أفرجت عنه النهاردة بكفالة لحين النظر في الدعاوي اللي أبو سها وأبو سهيلة قدموهم ضده.

الرائد أحمد: يعني لو فلت من المحكمة.

النقيب مُهيب: يبقى مش هيقلت من حد فيهم.

و بعد جلسات عديدة في المحكمة للنظر في دعاوي

هتك العرض والتغريب بالفتيات...

معتز: أيه الأخبار يا ابني؟ طمني.

علي: دعوة أبو سها اترفضت بسبب وفاتها وزوال
سبب الدعوة... ده غير إن مفيش دليل مادي زي
تسجيل فيديو مثلاً يثبت إن لؤي عمل كده معاها... كل
اللي متوفر شوية شات قبل مايفتحوا الكاميرا... وأنا
ربنا يسامحنى استغلّيت النقطة دي لصالحه.

العمدة: أخذت الشر وراحت.

علي: دعوة والد سهيلة هي كمان اترفضت لأنها
مش قاصر... سهيلة كانت أكبر من سها بشهور فرقت
معانا... وكمان متوفّرش أي دليل مادي على إن هو
اللي هتك عرضها سواء بالرضا أو بالغصب... أما
بالنسبة للجنين فمستحملش كل الضغط دا ومات في
بطن أمه سهيلة وكده سقطت قضية النسب برضه.

العمدة (مُبتَهجًا): راجل من ضهر أبوك يا ولا يا
أستاذ علي.

عمر: لا حول ولا قوة إلا بالله العلي العظيم.
خرج لؤي من كل القضايا الموجهة له شامخًا مزهواً

القائد الحقيقي

بنفسه فرحاً بها وفرحاً بعدالة القضاء، ولكن هناك
وجوه أخرى كثيرة للعدالة فهناك العدالة الآلهية وهناك
عدالة مَنْ لم يجد حقه بالقانون.

عاد لؤي لمنزله بصحبة والده وأعمامه...

فاضل: حمدالله على سلامتک يا لؤي.

لؤي: الله يسلمک يا عمي.

معتز (حزيناً): كده برضه يا لؤي!! كل ده يطلع

منك!!

العمدة: هو كان ضرب أي واحدة منهم على أيدها

يعني!!

عمر: يعني إنت مش زعلان منه في أي حاجة من

اللي عملها يا حاج ولا إنه كان سبب حتى لو مش

مباشر في قتل واحدة والثانية بين الإعدام والمؤبد!!

العمدة: وهو كان قالهم يعملوا في بعض كده!!

وبعدين اللي تفرط في عرضها تستاهل القتل من أهلها

أصلاً.

القائد الحقيقي

عمر: إنت دلوقتي تقدر تدافع عن سهيلة يا علي بعد
ما قضية خصومتها مع لؤي خلصت؟

العمدة (مُنزعجاً): إنت اتجننت في عقلك!! يدافع أيه
وزفت أيه!! مش كفاية كانوا عايزين يسجنوا ابن عمك!!
مروان: يا حاج هو يقصد إن الخصومة خلصت
والحمد لله وكلنا عارفين إن لؤي كان السبب في اللي
حصل بين سها وسهيلة وده معناه إن أبو دي أو دي
هيحطوه في دماغهم... فلو علي دافع عن سهيلة يبقى
اتقينا شر واحد فيهم على الأقل.

العمدة: وزودنا العداوة مع الثاني... وبعدين أعلى ما
في خيلهم يركبوه... احنا ابننا صاغ سليم.
معتز: معلىش يا عمدة خلي علي يدافع عن سهيلة
حتى عشان ضميرنا يرتاح شوية من ناحيتها... دى مهما
حصل كانت حامل في حفيدي.

العمدة: انت اتجننت يا دكتور!! مشافوهومش وهما
بيسرقوا قام شافوهم وهما بيتحاسبوا!! يعني في

القائد الحقيقي

المحكمة قولنا لؤي مش أبو الواد وإنت جاي تقول
الكلام ده هنا دلوقتي!!

معتز: أنا بتكلم بينا وبين بعض يا عمدة.

العمدة: يمين عظيم غليظ اللي هيجيب سيرة إن
علي يدافع عن سهيلة دي تاني ليكون آخر يوم له في
العيلة كلها ويبقى يعيش لوحده من غير عزوة بقى...
شوف حتى اسمها من وصفها... سهيلة... يعنى سهلة
كده لأي حد عايز يعمل معاها حاجة مش معززة
نفسها... وبعدين أمّال لو مكانش ابنك يا دكتور هو
اللي بتتكلم عليه!! مش ابنك ده برضه يا دكتور!!

لؤي (منزعجاً): عن إذّنكم أنا محتاج أروح أرتاح
شوية.

فاضل: ليه بس الكلمة الأخرانية دي يا عمدة!! ما
أنت عارف إنها بتوجع لؤي.

العمدة: أنا بتكلم عادي ولا هو وأبوه على راسهم
بطحة ومش مستحملين الكلام!!

معتز (حزيناً بشدة): كده برضه يا عمدة لسه اللي في
دماغك زي ما هو بعد العمر ده كله!! أمال لو مكانش
الواد شبه جده الله يرحمه بالمللي!!

العمدة: بس أبويا العمدة الله يرحمه مكانش شعره
أصفر وعينه خضرة أوي كده.

مراد: دي جيناته من أمه يا حاج... بس وارث جينات
الشكل من جدي الله يرحمه وده واضح أوي للكل.

العمدة: إنتوا سبيتوا المحكمة هناك وجايين
تنصبو هالي هنا!! ما أنا طول عمري بقوله يا ابن
الخواجاية ومش بيتكلم!!

مروان: يا حاج كلنا عارفين إن كلامك ده بيزعله بس
هو مؤدب ومش بيرضى يوريك إنه زعلان.

العمدة: آه... مؤدب... أمه مآدباه كويس... بأمارة
اللي عمله مع بنات الناس!!

علي: سبحان الله يا حاج!! إنت مش لسه قايل اللي
هيفتح الموضوع ده تاني هتطرده بره العيلة!!

القائد الحقيقي

معتز: بعد إذنك يا عمدة أنا اليومين الجايين دول لو
مش محتاجين لؤي في قضية سهيلة يبقى هاأخده ونروح
عند أمه شوية.

العمدة: أيه!! حنيت يا دكتور!!

فاضل: معتز عنده حقه يا عمدة... الواد محتاج
يرتاح ويقعد مع نفسه شوية يراجعها في اللي كان
بيعمله... وفي الغالب هو محتاج علاج نفسي لفترة.

العمدة: جرى أيه إنت وهو!! إنتوا شوية تطلّعوه
معقد من كلمة بقولها وشوية تطلّعوه مجنون!!

مروان: محدش مننا خالي يا حاج.

العمدة: والنبي تسكت إنت... مش كفاية القضية
اللي عملها لك طليقتك واحنا عمالين نماطل فيها لحد
مانقنعا بالمصالحة.

معتز: جوّزهم لبعض شرعي والحكاية تخلص يا عمدة.

العمدة: أجوّزهم لبعض إزاي يعني!! وأقول أيه

للناس في البلد لما يجيبها وفي إيدها العيلين والبت!!

القائد الحقيقي

علي: جوزها أخذهم منها مقابل إنه ميفضحهاش في المحكمة إنها كانت متجوزة عرفي وبتأخذ معاش أبوها وإن الولاد كانوا من حقه في فترة جوازها دي وهي كده كانت عاملة تدليس... وفي الحالة دي هتكون قدام المحكمة غير أمينة على الولاد وأمها ميتة أساسًا ف حضانتهم تروح لأبوهم فورًا بصفة دائمة... فمن قصيره كده عطته الولاد وبقت فاضية.

فاضل: جوزها له يا عمدة ده إن هي رضيت.

العمدة: لأ... حتى لو اتسجن مش هجوزها له... لا عاش ولا كان اللي يلوى دراعي ويخليني أعمل حاجة غصب عني.

معتز: ده مش غصب يا حاج... ده تصحيح غلط.

العمدة: وانت مخلتش ابنك يتجوز سهيلة ويقول إن اللي في بطنها ابنه ليه يا دكتور؟؟

معتز: عشان دي كانت أوامرك يا عمدة ومرضيتش

تسمعنا.

القائد الحقيقي

مراد: أنا وعمر اتكلمنا مع علي وأقنعناه يساعد المحامي بتاعها في السر من غير ما حد من عندنا ولا من عندكم ما يعرف حاجة.

سوزان: طب ليه في السر؟ مش يمكن بابا يهدا شوية لما يلاقيكم بتساعدوه.

مراد: العمدة لو عرف هيقتلنا.

سوزان: هو العمدة ده ناطلنا كده في كل مصيبة!!

مراد: العمدة ده عمي يا سوزان حاسبي على كلامك.

سوزان (مُنفعلة): العمدة ده هو اللي عقَّد لؤي وخلاه يأذي بنات الناس... العمدة ده اللي خلانا نحب بعض في الحرام... العمدة ده اللي خلا مروان يتجوز عرفي عشان خايف منه... العمدة ده اللي عنَّس عمر وعلي وخلا اللي بيحبوهم واحدة عنَّست والثانية أترهنت... العمدة ده المفروض يتحاكم وربنا على جبروته ده.

القائد الحقيقي

مراد: زودي بقى إن العمدة ده بقى بيني وبينك...
وللمرة الثانية مش هنعرف نتجوز بسببه.

سوزان: لأ خليها على بابا المرة دي... إنت فاكر
بعد سهيلة ما تتعدم أو حتى تتسجن بسبب ابن عمك إن
بابا هيرضى بجوازتنا دي!!
مراد: ده عقاب ربنا لينا.

سوزان: بس احنا توبنا وربنا سبحانه وتعالى بيقبل
التوبة.

مراد: شكلنا توبنا متأخر بعد فوات الأوان.
سوزان: لا حول ولا قوة إلا بالله... عملنا الحرام
محدث حس بينا... حيننا نعمل الحلال الناس وقفت
ضدينا.

مراد: ده جزء من تمن التوبة.



الفصل الثالث عشر

دفاتر قديمة



قرر علي أن يذهب ليزور كريستين في الدير الذي
تقيم فيه ليستمد منها الطاقة كما يفعل دومًا كلما ضاقت
الدنيا عليه...

كريستين: خيرا علي؟ شكلك مهموم قوي المرة
دي!!

علي: شايف الحق ومش قادر أنطق غير بالباطل.

كريستين: لسه بتخاف من عمك العمدة؟

علي: ومين قالك إن الموضوع تبع عمي العمدة؟!

كريستين: طول عمرك صاحب كلمة حق...

مبتقلبش كلامك غير عشانه.

علي: عندك حق.

كريستين: طب احكي لي بالراحة.

وبعد أن قص عليها الحكاية كاملة...

علي: أنا دلوقتي عايز أدافع عن سهيلة لأن الوقت

القائد الحقيقي

بيجري والمحامين اللي معاها مش قادرين يعملوا
حاجة لأن وقت النيابة ماواجهتها بتقرير الطب الشرعى
انهارت واعترفت علي نفسها.

كريستين: وعلى كلامك ف عمك حالف إن اللي
هيقرّب منها هيطرده بره العيلة.

علي: أيوا... لوع الطرد بره العيلة يبقى كان من باب
أولى إني أتجوزك من خمس سنين فاتوا.

كريستين: الكلام ده فات آوانه خلاص... خلينا في
اللي جاي... بلاش تغلط مرتين نفس الغلط... مش
عشان ضيعتني منك زمان بسبب عمك... يبقى تضيع
حياة سهيلة دلوقتي عشان عمك يرضى عنك ويفضل
مبسوط منك.

علي: إنت شايقة كده؟

كريستين: إنت نفسك مُقتنع بكده... عارف إن
عمك هييجي عليه يوم ويموت وإنت كمان هتموت
وقدام الرب هتتحاسب لوحدك... لو كنت جاي

القائد الحقيقي

النهاردة تاخذ إذني إنك تطلع من عباية عمك عشان
خاطر سهيلة في الوقت اللي معرفتش تعمل كده
عشاني... فأكيد أنا فخورة بيك وحاسة إن بُعدنا هو
السبب في الصحوة اللي إنت فيها دلوقتي.

علي: صلي وادعيلها دي ضحية لجبروت عمي
زيننا.

كريستين: يحميها الرب ومن كان منكم بلا خطيئة
فليرجعها بحجر.

أما على الجانب الآخر فلقد ذهب عمر في خلصة إلى
البلدة وهو مطمئن أن عمه العمدة لا يزال بالمدينة
ليتابع القضايا التي انهالت عليهم تباعاً وذلك ليُقابل
سُمية حُب عمره والذي لم يُشف منه حتى الآن...

عمر: وحشتيني قوي يا سمية.

سمية (ساخرة): إنت عيَّان يا عمر!!

عمر: عيان بيك.

سمية: وده من أيه بقى؟!

عمر (مستعجبًا): أيه ده اللي من أيه؟!
سمية: الحب والحنين اللي صحوا من قبرهم تاني
فجأة.

عمر: مين اللي قال إني دفتهم أصلاً؟!
سمية: إنت يا عمر... إنت اللي آخر مرة قولتلي
شوفي مستقبلك يا بنت الناس... كفاية الوقت اللي
ضيعته من عمرك وإنتي مستنياني... وأنا هأدفن حبي
وحنيني ليك جوا قلبي... إنت نسيت وألا أيه يا مستر!!
عمر: ده كان كلام في لحظة يأس.

سمية (مُندهشة): لحظة يأس!! بعد سبع سنين
مستنيك فيهم تخلص ثانوية عامة وكلية وبالواسطة
اتعفيت من الجيش وقولت تبدأ تشتغل عشان تبقى
مستقل لما تقول إنك عايز تتجوزني... وبعد كل
الانتظار ده تنهي علاقتنا في لحظة يأس!!

عمر (مذهولاً): أول مرة تبقى مُتحاملة عليا قوي
كده!! ده حتى يومها لما قولتلك الكلمتين دول فضلتني

ساكتة مردتيش غير بانك مش هتياسى من الحلم
وهتفضلي مستنياني لأخر عمرك!!

سمية: وعشان كده بقى إنت جايلي بعد ما فات على
الكلام ده ثلاث سنين جاي تلحقني في آخر عمري!!
عمر: بس إنتي لسه في عز شبابك.

سمية: عز شبابي ده اللي هو إزاي يعني؟! أنا عدت
الأربعين من شهرين لو مكنتش واخذ بالك... زي ما
أنت مخذتش بالك وإنت رابطني جنبك بإن أحلي
سنين عمري ضاعت واللي كان ممكن أكون أم فيهم.

عمر: لما اتكلمنا في موضوع الخلفة ده من أول ما
حبينا بعض... إنتي قولتي إنك عايزة تبقي أم لولاد مني
أنا بس... وإن كان ممكن تتجوزي جوازة تقليدية
ويطلع جوزك مش بيخلف أو تكونوا محتاجين علاج
فيتأخر الحمل عندك لحد سنك مايكبر... يبقى انتظار
بانظار فإنّ قررتي تستيني أنا.

القائد الحقيقي

سمية: أستناك وأنا معاك مش في الآخر تجيلك لحظة
يأس تخليني شايفة عمري كله بيطير أشلاء في الهوا
قدام عيني وأنا واقفة عاجزة إني أنقذه من إنه يقع
مكسور ومتفرفت مليون حته على الأرض!!

عمر: ولمّا أنا طلعت وحش قوي كده...
متجوزتيش راجل تاني ليه بعد لحظة ياسي دي!!
سمية: أتجوز راجل تاني!! راجل ياخذ حُطام قلب
منتهي الصلاحية!! لا يا مستر... لو إنت تقدر تعمل
كده وتظلم واحدة تانية معاك فمستحيل أعمل أنا كده.
عمر: ومين قالك إني أقدر أعمل حاجة زي دي!! أنا
من يومها مستني الوقت المناسب اللي ربنا يفك فيه
الكرب وعائش على حلم اللقا من تاني.

سمية: إنت شايف بقى إن ده الوقت المناسب؟
عمر: أيوه.

سمية: لمّا عمك انشغل عنك بقضايا ولاد عمالك!!
ده إنت حتى جاي وهو مش هنا في البلد.

عمر: مين اللي قالك حكاية ولاد عمامي دي؟!
سمية: إنت حياة المدينة نسّتك إن في القرية الدنيا
صغيرة ومفيش حاجة بتستخبي!!

عمر: أنا عمري مكنتش بستغل الفرص يا سمية بس
دلوقتي الدنيا اتغيرت... ممكن تعتبري إننا عملنا ثورة
على عمي... علي ابنه خرج عن طوعه ومسك قضية
سهيلة بشكل رسمي.

سمية: وإنت من بعده... يعني علي لو مكانش عمل
كده... كان زمانك مش هنا دلوقتي.

عمر: أبويا هو اللي قالي أشوف مستقبلي زي ماكنت
راسمه من الأول وكفاية خوف من عمي.

سمية: أبوك... يعني لو مش علي يبقى أبوك... إنما

إنت لأ

عمر (مُضايقًا): إنتِ ليه مُصرة ثقلي مني قوي
كده?! إنتِ عمرك محسستيني بإني صغير قوي كده

القائد الحقيقي

قدامك!! ولا هو بعد الأربعين الدنيا اتغيرت وأخذتني
بالك إنك أكبر مني على عكس ما كنت دائماً بتقوليلي
إنك بتحسي كأنك طفلة وإنّ معايا!!

سمية (مصدومة دامعة): أقلل منك!! صغير
قدامي!! إنت لخصت مأساتنا دي كلها في الكلمتين
دول!! دابحني بسكينة باردة ومستكتر عليا أصرخ وأنا
بطلّع في الروح!! وكمان جيه اليوم اللي بتعايرني فيه أني
أكبر منك!! متشكرة ليك قوي يا مستر والحمد لله إنني
عشت لّما سمعت الكلمتين دول منك قبل عمري
مايخلص وأنا عايشة على حبك اللي مش راضي يفارقني.
عمر (مرتبكاً): أنا.....

سمية: إنت تلحق ترجع مكان ماجيت قبل الليل ما
يليل عليك وإنّ هنا متعرفش تخرج من البلد فتضطر
تبات في دوار العمدة وإنّ أكيد نسيت قرص الناموس
عندنا شكله بيبقى إزاي.

القائد الحقيقي

عمر: سمية أنا....

سمية: إنت كفت ووفيت وموفق والله معك.

عاد عمر من البلدة مُجرراً أذيال خيبة الأمل عائداً

لليأس من جديد...

فاضل: شكلك ميبشرش بخير.

عمر: رفضتني.

فاضل: طبيعي ومنطقي.

عمر: ليه؟!!

فاضل: لإن مش بعد ما أنت إتخليت عنها مستني

إنها تفرح وتتنطط أول ماتقولها يالا بينا نتجوز.

عمر: بقت قاسية قوي.

فاضل: إنت شايف كده!!

عمر: أمال؟؟

فاضل: إنت عمرك حطيت نفسك مكانها؟ عمرك

حاولت تحس بوجعها شكله عامل أيه؟

عمر: أنا وضعي أصعب منها... أنا الراجل وأنا اللي محروم منها، وأنا اللي جاي على نفسي وقاعد من غير جواز عشان بحبها، وأنا اللي عارف إني لو اتجوزتها شبابها هينطفى بسرعة ده لو لسه مانطفاش أصلاً وكمان مش هتلق تخلفلي حته عيل أو حتى على الأقل مش هتلق تربيه معايا وهحتاس بيه بعدها ومع كل ده قابل وراضي!!

فاضل: يااااااااااااه كل دي أنا... ده أنت على كده نعمة كبيرة وهي الجاحدة رفستها برجلها!! تصدق أقنعتني... البنت دي فعلاً مش وش نعمة ومتستاهلش إنك اتكرّمت عليها وحصلت معجزة ملكش دخل فيها ساعدتك إنك تتجرأ وتأخذ خطوة إنك عايز تتجوزها!! روح شوفلك واحدة تانية شابة أصغر منك تفرح معاها بشبابك وتخلفلك عيل واثنين وتلاتة وتربيهم معاك ويمكن كمان تحتاس بيهم بعد منك.

عمر: إنت كمان هتيجي عليا يا أبويا!!
فاضل: آجي عليك أيه!! إنت لو تعرف دلوقتي أنا
متحصّر أد أيه على خلفتي ليك... روح يابني الله يصلح
حالي وحالك.

عمر: طب بس فهمنى بالراحة أنا غلطت في أيه؟؟
فاضل: أول ما البنت تقول لأ كنوع من التعبير عن
غضبها... تيجي إنت تعايرها بإنك جاي على نفسك
وحارم نفسك من مُتّع الدنيا كلها عشانها... إنت يمكن
تلاقي واحدة تانية فيها كل اللي إنت نفسك فيه من
الدنيا... بس عمرك ما هتلاقي واحدة حبّتك زيها ولا
هي هتكرر في حياتك تاني أصلاً... ولو فرضاً لقيت
زيها ف برضه هتكون زيها مش هتكون هي.

عمر: حسيت إني صغرت في عينها قوي وعشان كده
كرامتي نقحت عليا.

فاضل: فكل اللي كان مستخبي جواك طفا على

القائد الحقيقي

الوش... وقت الشدة معادن الرجال بتبان... ودلوقتي ده كان أشد وقت هي محتاجاك فيه بعد ما حست بالضعف بعد الأربعين وإنها المفروض تقولك لأ قبل ما أنت تندم في المستقبل إنك اتجوزتها في السن ده.
عمر: طب ما هي من الأول كانت عارفة إن السن ده هيجي عليها واحنا سوا.

فاضل: كنتم هتبقوا متجوزين ومعاكم عيل وألا اتنين وبدأتوا تكبروا سوا... إنما دلوقتي الوضع اتغير.
عمر: بس أنا متغيرتش ولا حبها جوا قلبي قل... بالعكس بيزيد كل يوم عن اللي قبله.

فاضل: يمكن... بس مطلعتش الراجل اللي هي تعرف تتسند عليه وتتحمي فيه من الزمن... بعثها عند أول مواجهة للمجتمع المُتمثل في عمك العمدة ورجعت تاني بعثها النهاردة عند أول أزمة نفسية هي بتمر بيها... أزمة الأربعين.

القائد الحقيقي

عمر: يعني أسافر لها تاني وأتكلم معاها من جديد؟
 فاضل: حقها... حتى لو رفضتك تاني.
 عمر (مُندهشاً): هي ممكن ترفضني تاني؟!
 فاضل: طبعاً... بس المرة دي هيكون رفض حب وإيثار... هتبيديك على نفسها... علشان تعمل بيت مع واحدة تعرف تعمل معاك أسرة وأولاد وكل الكلام اللي إنت قولته وإنت غضبان.
 عمر (مُصرّاً دامعاً): أنا مش عايز حاجة من الدنيا غيرها هي وبس والله العظيم.
 فاضل: يبقى ده تقوله لِمَّا تروح تطلبها للجواز في المرة الثالثة إن شاء الله.



الفصل الرابع عشر " الأخير " في المحكمة



بعد سماع هيئة المحكمة لمُرافعة النيابة ومناقشة الشهود جاء دور الدفاع عن سهيلة ليتلو دفاعه الأخير عنها، ولم يكن لؤي ومعتز ومراد متواجدين في قاعة المحكمة وكانت مفاجأة للجميع وأولهم العمدة الذي كاد يفقد الوعي من هول هذه المفاجأة بأن قام المستشار فاضل ليُخبر هيئة المحكمة بأنه انضم لفريق الدفاع عن سهيلة بعد أن قدّم استقالته عن دوره كمستشار في مجلس الدولة ليدافع عن سهيلة؛ فهو مقتنع بأنها هي الأخرى ضحية...

فاضل: أرجو من سيادتكم أن يتسع صدر روح العدالة لديكم لسماع قصة صغيرة وإن كانت في بدايتها لا توحي بأنها قد تُفيد القضية بشيء إلا أنها هي السبب في تجمُّعنا هنا اليوم.
القاضي: اتفضل.

فاضل: تبدأ هذه القصة في قرية صغيرة بطلها الأول هو العمدة الكبير الحاج الأسيوطي رحمة الله عليه والذي رزقه الله سبحانه وتعالى بثلاثة أولاد، حَلَمَّ معهم بأن يُصبح الكبير خليفة له في العمودية، وأن يصير الأوسط مستشاراً في هيئة القضاء العالي إلى أن يُصبح يوماً وزيراً للعدل لتحقيق العدل في كل أرجاء المحروسة، وأن يصبح الصغير هو طيب القرية على أن يبني له فيها مستشفى خيرية يُعالج فيها الغلابة من أهل القرية.

كان هذا الحلم النبيل هو مصنع ما تلاه من أحداث بعد ذلك حيث تُوفي الأب وخلفه الابن الأكبر في العمودية وصار الثاني رئيس نيابة وقتها كما كان الجزءان الأول والثاني من الحلم وأصبح لزاماً على الصغير أن يُحقق باقي حلم أبيه.

ولكن الصغير كانت له أحلامه الخاصة فبعد أن سافر لندن والتحق بجامعة أكسفورد ونجح فيها وأصبحت له حياته الخاصة هناك، تزوج من فتاة

القائد الحقيقي

إنجليزية تحترف الرسم التشكيلي بعد أن أنجبت له ولده الوحيد، وليركز الجميع هنا فلقد تزوج بها بعد أن أنجبت ولده الوحيد، بعد وليس قبل.

بعد وفاة العمدة الكبير فلقد أجبر العمدة الجديد أخاه على العودة إلى مصر لتكملة حلم أبيهما فجاء الأصغر مُضطراً لِيُنفذ وصية أبيه، ولكن زوجته الإنجليزية رفضت أن تترك حياتها المُزدهرة هناك وتأتي لتستقر في بلدة صغيرة تكاد ألا تظهر على الخريطة ولا يشعر بها أحدٌ.

صمم العمدة كذلك على عودة الولد مع أبيه ليتربى تربية شرقية مُطعمّة بالعادات والتقاليد والأعراف ووافقت الأم نظراً لظروف تنقلها بين المعارض والمتاحف في أوروبا طوال الوقت؛ فكبر الابن المزدوج الجنسية وهو لا يسمع من عمه العمدة عند مناداته إلا كلمة "يابن الخواجاية".

كان يظنها في البداية مدحاً وتمييزاً ولكنه عَلمَ عندما

القائد الحقيقى

كَبِرَ بِأَنَّهَا سُبَّةٌ يَسِبُهَا لِإِعْتِبَارِهِ عَفْوًا "ابن حرام" كما ذكرت سلفًا ولكون أمه مُجرمة خاطئة بأنها سلّمت نفسها لحبيبها دونما زواج حتى وإن كان أول من دخل حياتها، وليركز معي الجميع مرةً أخرى - أول من دخل حياتها - أول.

وهنا نمت العقدة عند الطفل ليصبح شابًا يافعًا لا هوية لديه إلا جعل كل العذراوات يستسلمن له حتى لا تُصبح الخواجاية وحدها هي المجرمة الخاطئة، ومع مرور الوقت كان لابد للعقدة أن تتطور فجاءت الرغبة في التوقيع بفتاتين أقل وصف كان يقال عنهما أنهما روح واحدة في جسدين.

وأقصد هنا سها وسهيلة، وهكذا نعود ليوم ارتكاب الجريمة والتي اعتبرها مُدبرة منذ حَلَمَ العمدة الكبير بحلم استبد فيه بملكيته لأولاده الذين وهبهم الله له " يهب لمن يشاء الذكور"، كما تم البدء في تنفيذ هذه الجريمة على يد الابن الأكبر الذي أصبح العمدة خلفًا

القائد الحقيقي

لأبيه ليستبد هو الآخر بحياة أخويه تنفيذًا لوصية والدهم.

في ذلك اليوم سافر الأستاذ عبدالغفار والسيدة فريدة إلى بلدتهم لتقديم واجب العزاء وكالعادة خرجت سها إلى شرفتها لتعطي سهيلة صديقتها التقرير اليومي عندما يتعذر الاتصال الهاتفي وطلبت منها الحضور لقضاء بعض الوقت معها ولبت سهيلة الطلب ودار بينهما الحوار كالتالي...

سها: عايزة أقولك على سر بس احلفي بربنا إنك مش هتقوليه لحد خالص.

سهيلة: والله أزعل منك... إنت من إمتى قولتيلي سر وأنا طلّعتة بره!!

سها: أنا ولؤي خلاص هنتجوز.

سهيلة: قديمة ما أنا عارفة إنكم اتخطبتوا من أسبوعين يا واطية.

سها (مُندهشة): مين اللي قالك؟

سهيلة: إنتِ ناسية إن أنا وهو أصحاب من ساعة
مادخلت الجامعة وروحت مكتب الديكور بتاعه
أتدرب معاه فيه.

سها: بس هو قالي إنه مقالش لحد خالص على
الموضوع ده!!

سهيلة: وهو أنا أي حد برضه!! عيب عليكِ.
سها: بس هو قالي إنكم أصحاب خفيف خفيف
وإنه مُقَصِّر معاك من ساعة ماخطبني.
سهيلة: ليه؟!!

سها: عشان حس إنك ميالة له فحب يبعد عنك
شوية لحد ماتتعودي على غيابه.

سهيلة (ساخرة): ههههههههههههه هو فهّمك كده!!
مسكينة..

سها: ليه بتقولي كده؟

سهيلة: أنا ولؤي مبقاش ينفع نبعد عن بعض
خلاص.

سها: مش فاهمة!!

سهيلة: اسأليه وهو يفهمك.

سها: واسأله هو ليه وإنتِ قدامي وممكن تفهميني!!

سهيلة: مش هتصدقيني.

سها (متوترة): والله هصدقك وهو أنا من إمتي

كدبتك في حاجة قولتها قبل كده!!

سهيلة: أنا ولؤي مرتبطين من بعد ما عرفته بشهر

واتفاجئت بيه جاي من أسبوعين يقولي إنه خطبك...

ثورت واتخانقت معاه وحلفلي إنه مضطر يعمل كده.

سها: مضطر!!

سهيلة: أيوه... لَمَّا عرف مني إن حالتك النفسية

تعبانة بسبب سخافات كريم معاك... قرر إنه يخطبك

عشان ثققت في نفسك ترجعلك تاني... وبعد ما يطمئن

إنك بقيتي كويسة... يبجي يقولكم إنه كَلَّم العمدة على

جوازكم بس رفض عشان كان مكتوب كتابك قبل كده

وهو مستحيل يتجوز من غير رضا أهله.

سهيلة: لا والله!! طب خلي حد غيرك يقول الكلام ده.
 سها (مرتبكة): إنت بتقولي كده ليه؟!
 سهيلة: عشان أنا عارفة اللي حصل بينكم النهاردة
 الفجر.

سها: وهو أيه اللي كان حصل يعني؟؟
 سهيلة: إنتوا مش كنتوا فاتحين الكاميرا امبارح
 وسرحتوا مع بعض في قصة حب شهوانية غير راقية
 بالمره وحصل اللي حصل ومفوقتيش غير وإنت غرقانة
 في دمك.

سها (مصدومة): هو اللي قالك؟
 سهيلة: ماقولتلك مبيخبيش عني حاجة خالص...
 بعد ما قفل معاك كلمني يعترفلي لإن ضميره كان مآنبه
 إنه خاني معاك.

سها: خانك معايا!! ده اللي ضميره آنبه عليه!! طب
 وأنا والفضيحة اللي هتفضحها دي!!
 سهيلة: إنت كان مكتوب كتابك قبل كده... يعني

القائد الحقيقي

ممکن تلبّسها لكریم وهو مش هيقدر يثبت حاجة
وخصوصاً إنه دلوقتي غير متزن وصعب حد يصدقه لو
قال إنه معملش كده معاك.

سها (مذهولة): كإنه كان مرتبها من الأول!!
سهيلة (مهزومة): إنت عملتي كده ليه؟؟ طب أنا
طايشة وملقتش اللي يريني كويس... أب كل همه
الفلوس ورمى أختي الكبيرة لزوج كارهة العيشة معاه
بكرشه المليان فلوس ده... وأم طول النهار مش وراها
حاجة غير إنها تشتكي من جوزها ومن خيانتة ليها طول
الوقت لَمَّا عقدتني من الرجالة لحد ما لقيت لؤي
وخدعني بحنيتة... إنما إنت عملتي كده ليه؟

سها (مهزومة هي الأخرى): الكبت وعدم الثقة في
النفس... أبويا كابتني طول الوقت ما بين حرام
وعيب... عمره ماقالي حرام ليه أو عيب عشان أيه... ده
غير سي كريم اللي كسر نفسي بعد موضوع أخته وانتقم
من اللي جوزها بيعملوا فيها مني أنا.

القائد الحقيقي

سها: إنتِ أهلك هيتفهموا موقفك وهيساعدوكِ ده لو
 حسوا بيكِ أصلاً... وقتها هتقولي لبابكِ إن ربنا انتقم منه
 عشان بيخون مامتك... إنما أنا هعمل أيه مع بابا!!
 سهيلة (مندهشة): إنتِ هبلة وألا بتستهيلي عشان أفهم!!
 سها (جادة): لا ده ولا ده.

سهيلة: يا بنتي بقولك جيه حكالي بعد اللي عمله معاكِ
 وده معناه إنه شاريني أنا... وعلى فكرة هو اللي قالى
 أعرفكِ دلوقتي باللي قاله بإن إنتِ تقولي فيما بعد لما
 يتقدملكِ عريس تاني إن كريم هو اللي عمل معاكِ كده.

سها: هو عارف إنك طالعلي دلوقتي؟
 سهيلة: أنا مبدخلش الحمام غير لَمَّا أقوله يا بنتي
 عشان لو اتصل ميزعلش لَمَّا مردش عليه وقتها.

سها (متوترة): طب وهيعمل أيه مع بابا؟
 سهيلة: هو عارف إن باباكِ دلوقتي في عزا وعشان
 كده هيستنى لبكرة وهيبقى يفوت عليه في الشغل عشان
 يقوله إن عمه رفض الجواز وهو مقدرش يقنعه.

سها (مشوشة): كل ده عشان خاطر ك!! يخطبني
عشان إنت زعلانة عليا ويسيبني عشان إنت تتجوزيه!!
طب عمل معايا كده ليه مادام ناوي يسيبني من الأول؟؟
سهيلة: لما اتخانقت معاه وقت ما قالي إنه عمل
معاك كده... راح رادد عليا بإنها لحظة ضعف إنساني
وهو إنسان مش ملاك بجناحين.

سها (ساخرة): وطبعاً صدقتيه!!
سهيلة: بقولك حامل منه... حالي امل... يعني
حتى لو مقالش مبررات مضطرة أتخرس وأسكت
خالص.

سها (شبه شاردة): عشان الحمل!!
سهيلة: طبعاً عشان الحمل
سها (كالمهوس): يبقى لازم مايقاش فيه حمل
عشان الرووس تتساوى ونشوف هيختار مين فينا
وقتها.

القائد الحقيقي

فاضل: انهالت سها على سهيلة بالضرب كالمجنونة
وما كان من سهيلة إلا أن تُدافع عن نفسها ولم تُفَق مما
يفعله في بعضهما البعض إلا عندما وجدت سها
لا تتحرك لتكتشف أنها قتلها أثناء مشاجرتهم على
لؤي، لم تكن سهيلة لتقتل صديقة عمرها وقطعة من
روحها إلا بعدما فكرت سها أن تقتل روحًا بداخل
سهيلة لا يوجد لديها من هو أعلى من هذه الروح.
أنا لا أبرر خطأ سهيلة ولا أدين سها ولا أُلقي بالتهمة
على لؤي لأنه السبب الرئيسي لِمَّا حدث بقدر ما أدين
مجتمعاً بأكمله شارك في هذه الجريمة، جد حَلِم وقرر
ابنه الكبير تحقيق الحلم دونما الرجوع لمن سينفذ هذا
الحلم؛ فأصبح العم طاغية والكل يُلبي رغباته ودفع كل
الأحفاد الثمن كُلاً بطريقته فليس لؤي وسهيلة وسها هم
فقط ضحاياه.

فالعمودية والعادات يقولان لا لزواج المصري من
أجنبية خارجة عن التقاليد التي نعتنقها نحن كمجتمعٍ

شرقي، ولا لزواج المسلم من مسيحية، ولا يتزوج الرجل الصغير من المرأة الأكبر منه سنًا، ولا يتزوج الشاب من امرأة مطلقة ما لم يتزوج هو الآخر من قبل، وكل هذه العادات فرضها العمدة على الأحفاد، الكل دفع الثمن سواء الأبناء أو الأحفاد أو من عبروا حياة هؤلاء الأبناء والأحفاد.

سُهيلة ضحية كما كانت سها ضحية وغيرهما فتيات كثيرات والجاني الأصلي في هذه القضية هو العادات والتقاليد التي سهّلت الحرام وأغلقت باب الحلال في وجه من أرادته، فإذا أردت أن يحترمك الناس في هذا المجتمع المصاب بداء ازدواج الشخصية فافعل ما تريده خلف الأبواب المغلقة في الظلام ثم أخرج للناس في النور وأنت ترتدي عباءة المجتمع الجميلة المرصعة بالعادات الذهبية والتقاليد اللؤلؤية والأعراف الفيروزية.

القائد الحقيقي

ولكن العمدة لم يكن هو المنفذ الوحيد لهذا المخطط المجتمعي العقيم بل كان له شركاء؛ فوالد سهيلة كان مساعداً فهو ذلك الرجل السكير العريد الذي مضى من عمره الكثير والكثير ضائعاً على ملذاته واللهاث وراء شهواته تاركاً وراءه زوجة يائسة محرومة من الحنان لتكون هي المثل أمام ابنتها، ومن منطلق يمهمل ولا يهمل فجاءت متحقة في سهيلة ابنته ليتجرع من نفس الكأس الذي طالما أذاقه لكثيرات وكثيرات، وهذا لا يعفي مطلقاً لؤي مما فعله معها ولكل جزائه يوم الحشر العظيم تحت عرش الرحمن.

وكان هناك مساعداً آخر غير والد سهيلة ألا وهو الأستاذ عبد الغفار والد سها الذي أغلق عليها بالمتاريس بحجة الخوف عليها، وما كان ذلك سوى مبرراً واهياً يُخبئ خلفه بخله الشديد والذي كان أسلوب حياة؛ فكان بخيلاً حتى في حنيتة ومشاعره على زوجته وابنته التي اضطرت في النهاية أن تبحث عن هذه

الحنية المفقودة داخل منزلها خارج المنزل مع أول رجل أظهر لها فيض شلال من الحب والحنية والتمتع.

سها وإن كانت مارست معه الرذيلة فليس ذلك دليل على نقص دين أو زيادة شهوانية، ولكنها أرادت أن تُقدم هدية لمن أذاقها الحب والحنان ولكنها لم تجد أغلى من نفسها لتقدمها له هدية، ذلك الشاب المُستهتر العابث كما يبدو ظاهرياً اليأس المحروم فعلياً من الحنان والاحترام ممن كان له قدوة ومثل أعلى طالما نظر له وهو صغيراً على أنه مثال الهيبة والاحترام ليجده يحتقره طوال الوقت، مما جعله يفقد الثقة في نفسه وفي مجتمعه وجعله يستدعي طاقة الشر الكامنة بداخله ليتمرّد على ذلك المجتمع السطحي الظالم.

وهكذا يكون المجتمع هو القاتل الحقيقي ليس لـ سها وبرائتها فقط إنما هو من قتل العُذرية في سهولة وقتل الرجولة والنخوة بـ لؤي، حاكموا المجتمع

القائد الحقيقى

وعاقبوه إن استطعتم قبل أن تعاقبوا هذه الفتاة والتي لا
أعتبرها جانية ولكنها مجني عليها هي الأخرى.

وعذراً على الإطالة وإهدار وقتكم الثمين، وأرجو
من هيئة المحكمة الموقرة إرفاق هذا الملف بأوراق
القضية، حيث يحتوي على تقرير طبي بأن لؤي قد تم
بتر عضوه الذكري أثناء مشاجرة بعدما تعرّض له
مجموعة من المُلثمين ليلة أمس أثناء عودته من عمله
للمنزل والذي كان يستعد للسفر بعد المحاكمة عند والدته
ليتلقى العلاج النفسي هناك بعد أن أقنعه والده بذلك، وهو
الآن بالمشفى في غرفة الرعاية المشددة مُعلّق بين الحياة
والموت، وليتجاوز الله عن سيئاتنا أجمعين.

القاضى: تُرفع الجلسة للمداولة.

الحاجب: محكمة _____.

كَمَتَ بِحَمْدِ اللَّهِ



نبذة شخصية

♥ هبة سعيد مواليد ٢٦ يناير من الأسكندرية.

♥ الأعمال الإلكترونية: منها "ذنب لا يموت"،
"فلاش باك"، "شلة بنات".

♥ الأعمال الورقية:

"ليدو"، "استحلال"، ضمن المجموعة القصصية:
"نون النسوة" تحت مبادرة نساء مُبدعات.

♥ من أحلامي:

أن يعود الحب للقلوب والذي تُحل به كل المشاكل
على أن يكون مصحوب بالثقة والاحترام والتفاهم.

♥ أن تعلم كل فتاة أنها كائن مستقل وليست تابع،
فلا مانع أن يكون لها شريك في الحياة ولكن لا يجب
أن تكون أمة لهذا الشريك.

♥ أن تعلم كل فتاة وتتيقن أن من يحبها سيسعى أن

القائل الحقيقي

يعاملها معاملة الأميرات بأن يتوجهها شريكة لحياته في
العلن مُتشرفاً بأن تكون هي أمّاً لأولاده، أما من يحتفظ
بحبها سراً فهذا لا يتعامل معها إلا ك محظية مهما كان
حديثه لها مغزول بالكلام المعسول والوعود الواهية
والمبررات الكاذبة.



الفهرس

٣	مقدمة
٤	إهداء
٥	الفصل الأول: جريمة قتل
١٥	الفصل الثاني: شقة العُزَّاب
٢٨	الفصل الثالث: في النيابة
٣٦	الفصل الرابع: في مكتب علي المحامي
٤٧	الفصل الخامس: وشوش
٥٧	الفصل السادس: شهادة جديدة
٦٥	الفصل السابع: مُتهم جديد
٧٤	الفصل الثامن: حادث جديد
٨٤	الفصل التاسع: كلمة الطب الشرعي
٩٠	الفصل العاشر: شهادة الأم

القائد الحقيقى ١٦٠

الفصل الحادى عشر: قرارات العمدة ١٠٧

الفصل الثانى عشر: من القاتل؟! ١١٢

الفصل الثالث عشر: دفاتر قديمة ١٢٦

الفصل الرابع عشر " الأخير ": فى المحكمة ١٣٩

نبذة شخصية ١٥٧

